

# गुरु दक्षिणा



गिरजा कौल



# गुरु दक्षिणा

गिरजा कौल

पुस्तक मिलने का पता

गुरु आश्रम

शक्ति नगर

जम्मू







आदरणीय गुरु माता  
श्रीमती मोहनी जी (मम्मीजी)



(अ)

## ॐ स्यदि दाता श्री गणेशाय नमः

ग्वेरु माता श्रीमती मोहिनी जी (मम्मी जी) जायि स्वयबुग गामस मँज सन 1930 हस मँज । अँम्य सुन्द पिताजी ओस अध्यापक आसनस सूँत्य सूत्य अख बोड़ चकदार ति । अथ गरस मँज ओस साद-सन्तन तुँ धर्मी लुकन हुन्द युन गछुन । अवह किन्य ओस अति धर्मुक माहोल तयस व्यठ मम्मी जी आँस लक्कचारुँ प्यठ दीवी दारन तुँ थापनायन गछान यमि किन्य अमिस सदाह वर्यशे दयि कृपा सपुँज । यलि यि मसा च्वदाह वरिश आस अमिसुदँ खांदर सपुद पन्डित सर्वानन्द सुँन्दिस सुपुत्र श्री त्रिलोकी नाथस सूत्य । माता जी आयि पतुँ ब्रमज्ञाणी तुँ तीजवान ग्वरु महाराज श्री योगराज जी सुँन्दिस समर्पकस मँज । यि ग्वरु जी ओस प्रूँह अकिस आश्रमस मंज आसन त्रॉविथ । प्रूँय ओस म्यानि ग्वरु मातायि (मम्मी जी) हुन्द बर्था ति नौकरी करान । ग्वरु महाराज स्वामी योगराज जियन वोन आँमिस जि चूँ छक पँतिम्यव सतव ज़नमव प्यतुँ म्याँन्य कूर ।

स्वामी-जियन ह्यँच अँमिस परीक्षा तुँ यथ मंज यि पास स्वन द्रायि । मातायि संबोल ग्वरु महाराज सुँन्दि आश्रमुक वारयाह बार । पतुँ कुर अमि पनुन सोरुय जीवन ग्वरु महाराजस अर्पण । ग्वरु महाराज सुँन्दि अर्न्तध्यान सपदनेँ पत तुल मम्मी जी आश्रमुक सोरुय बार पनन्यन फेक्यन प्यठ । अमिसुन्दिस आश्रमस मंज ओस प्रथँ दोहुँ सतसंग तुँ कीर्तन लगान । युस ति अथु आश्रमस मंज वातान ओस सु ओस ग्यानुक खजानुँ ह्यथ वापस नेरान । माता जी आँस प्रथ सातुँ तुँ प्रथ विजि दोयम्यन हुँन्ध दुख-दोध कम करँनुच कूशिश करान रोज़ान । परमात्मा तुँ ग्वरु महाराज सुँन्जि कृपायि सूँत्य छु माताजी हुँन्दिस म्वखस प्यठ प्रथ साँतु त्युथ तीज आसान यमि सूँत्य प्रथकांह इनसान मूहित छु गछान ।

यि किताब छसन बुँ पननि हशि-माजि श्रीमती तुलसीदेवी समर्पित करान । तम्यसुन्ज आखिरी ख्वाहिश आँस जि बुँ लेखुँ कॉशिर्य पाँठय लीलायि तुँ अखतुँय ग्यवख ति

(आ)

पानय । यि कॉम सपुँज ग्वरु महाराज तँ मम्मी जी हुँन्दि आशीर्वादुँ सँत्य पूरु तुँ, म्य लेछि लीलायि यिमव मंजुँ चॉर कँस्थि म्य कँह यथ किताबि अन्दर शामिल करि । म्य छे नुँ पताह जि म्य यि ल्यूख सु कोताह वजनदार तुँ मियारी छु अलबतुँ यि म्य बावनायि तुँ श्रदायि किन्य वुज्योव ति ल्यूखुम । यि किताब छपावनस मंज कोर म्य वारयाहव अँथुरोट, यिमन मंजु श्री चमन लाल राजदान तुँ तँसुन्ज धर्मपतनी श्रीमती सोनी राजदान, श्री मोती लाल रैना श्री अवतार जी भट्ट, श्री प्यारेलाल 'सुदेशी', श्रीमती प्राणा जी भट्ट, श्रीमती सुनीता तिक्कू तु श्रीमती गिरजा दरन ति शेहलोलुम अथुँ तु किताब बनावनस मंज करख बेहद मेहनत ।

पूज्यनी श्रीमती कमला जी हुँन्ज छस बुँ स्यठाह आभारी येग्य म्य विजि विजि पनुन शहुल तुँ मायिबुरुत अथँह कलस प्यठ थोव ।

गिरजा कौल

57,2-A त्रिकूटानगर जम्मू  
Phone No.473308



आदरणीय माता जी  
स्वर्गीय तुलसी देवी





(इ)

## ज्ञान

इनसानस मंज छु अध्यातमुंवाद त्यूत प्रोन यीच्चा इनसानसुंन्ज पैदायिश प्रॉन्य छे । अमि ग्यानुं मार्गन रॅट प्रथ दोरस मंज नॅव्य रंग । इबतिदाई इनसान रुद क्वदरत्क्यन ज़हूरन थलि वुछान । यि अमल रुज लछि बॅध्यन वॅर्ययन जॉरी । पतँ गयि यिमन ज़हूरन हुँन्ज परसतिश शरु । वारुँ वारुँ गव इनसान इर्तिकार्ई मंजिल तय करान तुँ इर्फानक्यन ज़मज़मन ति लॅज वुजिन्य । भक्ति वादुँक्य नॅव्य नॅव्य रंग आयि बारसस । भक्ति मंज गॅयि वॉरु सर्परस्त पॉदि तुँ इनसानस गॅयि वॅजूदूँन ज्ञान । अँमिस गन्योव दयि लोल । अमिस प्योव वतुँ हावुँक्य सुन्द ज़रुरत । यिथुँ कॅन्य आयि ग्वरोक्वल बारसस । ग्वर बन्योव शेशुँ सुँन्दि क्रेयायि हुन्द महवर तुँ वारुँ वारुँ खँयू साधनायि हुँन्दिस आकाशस ग्याँनुक्य लछुँ बॅध्य सिर्यि । सादकस गन्योव दयि लोल । येलि अँम्य लोलन अँमिस छठ कॅड अँमिस चोल बेवायि नीरिथ जीरुँ बॅमुके नूरुँ सूँत्य तन छस नावान । पीरुँ सुन्द सीर ललवान छस । कौशिर भक्ति शाईरी मँज छुँ लल दँदि हुन्द नाव सरसा लल द्यद छि वनान म्याँनिस च्यतुँ त्वरगस दिच म्याँन्य गरु महाराजन ग्यानुँ लाकम ! म्यँ कर्य यँन्दे कोबू ! बुँ (लल) चायस मनँकिस बागस अति वुछिम शिव तुँ शक्ति वास कॅरिथ तुँ म्यति त्रोव पनुन पान यिमनुँय चरनन तल !

लल देदि पतुँ द्रायि वारा शिव यूगिनी यिमव प्रानस तुँ पानस म्युल कोरँ तुँ आत्नुँ दीप प्रज़लोलुख त्युत समयुक गाह असि ताम वोत ! यिमन मंज छि वारव शैली मंज र्वपुँ भवॉन्य सरस ! अमि पतुँ छि रँच द्यद । सूफी शाईरी मँन्ज वेधँ नाव ।

1990 थस मंज गोवँ आतशफिशानुक धमाकुँ सोरुय बटुँ कोम—धनुँ वान—ग्यानुँ वान तुँ नॅशठावान लूकन हुन्द यि कारवान बन्योव वुछानँ वुछान रिफूजी ! बेगर गछनुँक्य अम्य वँहशतनाख माहोलन वुज़नोव सान्यन कोर्यन तुँ बॅन्यन हुन्द अन्तर आतमा ! यिमव द्युत दम फुटय अमारन इज़हार तुँ लाल तुँ जवहर जॅरिख अदबुँकिस ताज़स ! बिमला रेनायि वॅन्य वारव ! सुनीता रेनायि कर कषणुँ भक्ति, राज कुमारी राजदान आयि कोमी

(ई)

बौतन हुँजं डौल्य ह्यथ! तूँ गिरजा कोल बनेयि भक्ति वादुँच मीरा भाई! अमि वुज्जुनोव शौद,  
साफ तूँ इबहामुँ रोस साधनायि रसं! यि ज़ायि मराजकिस सदर मुकाम अनन्त नागैः यि छँ  
तमे अलाकुच ड्रयकि दयद येम्यँ अलाकन लल दयद, नुन्दुँ रूयोँश, रेश्य मोल, पर्मानन्द तूँ  
क्रशनुँ राजदान पौदुँ कँरूय!

गिरजां छि भक्ति वादुँच ग्वनमाथ यौसिँ हमुँ अज ओस्त फलसफुँ मानान छि ! यि  
छँ ग्वरुँ चर्नन पान पुशरिथ ध्यान धारनायि हुन्दिस यन्द्रस सतुँ सौँव्यू पन खारान!

तन मन छलँ हा, ग्वरुँ छँद्रय वाने  
स्तुँ ग्वरुँ म्याने सतुँ ग्वरँ म्याने!

अमि छु ग्वडनिचि हेरि प्यतुँय मनुक सँन्ययास धारन कोरँमुत! यि छनुँ गफुँ कथा !

साध छि ज़ालान तूँ गालान पान  
साध कति ज़ानी मान अपमान  
कन थावान तिम लोलुँक्यन नादन  
साधन सँत्य करनाक्तम ज़ान

यि छि मानान जि साधनायि हुन्द ग्वड न्युक पडाव छु सतसंगं यि छु तमिसय हौंसिलसपदान  
यस ग्वरँ क्रपा हौंसिल सपदि!

क्वसंग त्रावुन, सतसंग प्रावुन  
सतसंग प्रावुन, ग्वरँ व्वपदीश  
सतसंग ग्यानुक अश्रँत चावान्  
ग्वर छुनुँ काँसैँ, परँ पावान

ग्वरँ अनुग्रेहँ पतुँ छु साधक भक्ति हन्द्यन असरारन हुँजं ज़ान हासिल करान। यि छि  
सीरयतक्यन अंसरा रमोज़न सनानं

यि छु पनुन आसुन मशराविथ परम प्रकाशस वेंजूद अर्पन करान तुँ वनान!

मनुँकिस आनस खय क्याजि खारान  
यिहा छुय दयि सुन्द रुवनि मन्जोल  
बागिवान मँज्यलिस ल्वलि ललँनावान  
ग्वर छुनँ कौसे,परुँ पावान

अथ मनुँकिस रूवनि मँज्यलिस मजं दयि नावस ललविथ अबदियत तुँ नवीन हॉसिल  
करनँच लय तु प्रय गँन्यरावान। मगर अमे सातुँ छु साधकस बासान जि यँन्द्रे छँ  
क्रेयौयि हुँन्दिस मार्गस ठरि बेहॉन तुँ रुकावट पौँदुँ करान!

काम क्रूध गालुन, स्यठा दुशवार  
लूब,मुहं ज़ालुन, अथस हयोन नार  
पँरि पँरि कैन्ह ना आम अन्जामो  
होल गोम सूज़मय,पैगामो

गिरजा छु लोलुँकिस तथ मंजिलस मंज वॉच मुँच यथ जायि अहद ज़र्गर छु वनान!

आपताब तौहीद ज़िकरि असमानस  
ऑर्रयफन छु तौहिदुँ निशि पानस  
सादक छु शक्ति नावस सनान तुँ वनान!  
रुँच वथ माता,छरव हावान  
भँक्तयन कोता, नूर त्रावान  
सवान दौध्यन कासान त्रूर  
ग्वरु पादन मॉज करय,गुरुँ गूर

(ऊ)

नूरक आवास लगन गौ सीरि पिनहम प्रोवुन! बासान छु अमि छि साधनायि हुँन्ध वाराह  
मँन्जिल तय कँर्यमित्य!तिक्याजि नूरक तसवुर छुँनु हन्नु दीदन गाशुरावान ।

वनुँक्यालेखुँ क्या, क्या छम खबर  
मनचे वारि द्रायि, ग्यानुँच बुबर  
कनि तुँ कछ कडँनावतम डूरी डूरी  
हुरी लगुँये अथ नूरस!

गिरजा छें भक्ति वादुच साधक! यि छँ तुलसीदास सूरदास तुँ कँबीर सुँन्ध पॉत्रय अँथ्य  
लयि मंज प्रकाशुक जगत दीदमान वुछान! यि छँ अँजीब तजरुबन हुन्द अेहँसास  
करान तुँ यिहै प्रकाशछु अँम्य सुन्द मँन्जिल बनान!

हमसुँ गथ प्रावनुक अभार छु साधकस अँरयजू मन्द बनावान । यिम आलब  
अगरचि कौशरि शायरिमंज आम मगर युसअसलूब तूँ अनहार गिरजा छु वरतावस मंज  
अनान सु छु परुन लायक!

राम रठ या रहमान  
त्रावुन छुय अभिमान  
सूहम शब्द बोजि यार  
सँदरस कोनुँ दिख तार

म्यु छँ आशा जि गिरजा जी अगर अमे आयि पकान गँयि काशिरिस भक्ति वादस मंज  
गछि अँभिस मुनफरद मुकाम हॉसिल!

मोहन लाल आश  
दुर्गा नगर, जम्मू

## पहचान

कौशिरि भँक्ति शायरी हुँन्द बजर छु यथ कथि मँन्ज कि भक्ती छि सुँमनह इश्वरस श्रन सपदिथ आन्द सदरस नखँह वातँनच मुसलसल कौशिश करान। सुँ छुँ शिवस ति पूँजान तुँ पाद छलान, राम्चन्द्रस बर-मँनदिन्धन् नाद लायान तुँ छालहमारवनिस बालकष्णस मोन्य-मीत् करान। भक्ती छि पननिस मँजिलस ताम वातन् खँतरह प्रथ् अन्दवन्द मशिरिथ नाद लायान। पान अर्पन करान तु लोल लल्वान। शेरस पोश लागान। चशमह वँथरान। अशिवानि दय्गथ छलान तुँ जानि अजीज निछावर करान। भक्ती मँन्ज गव योहय् आत्म समर्पन। प्रथकाह छु नँ शशतरविह करहँ हयकान चापिथ ललि चोप तुँ अर्मत प्रोवुन, रोपि चोप तुँ इशवर लुबुँन, नन्दरामन चोप तुँ परमानन्द सपुदँ।

बेघर् सपदिथ तुँ ग्रीशम् क्रायि पनुन् पान् तुँ नोजुक जज्बात छेपि दिथ लुँब अँसि यकीनन पँनुन वजूद युस हतह बदन वरियन हँजि गुलामी व्यतराविथ तुँ लतहमँजि सपदिथ हायिबुजि ओस गोमुत। दँपान दयि सँन्ज दयिगथ छि जरुँर यिन्ह-वालि पगॉहच च्यनँहवन दिवान। प्रथ कौसि छनह लाल परजहनावनच सकत् आँसान।

- 1- प्रोफेसर अमरनाथ दर साहिबन्य "दरशुन" 1993
- 2- श्री निरन्जन नाथ दर सुमन् सुन्ज "शशिकल" 1998
- 3- भवानी भाग्यवान दयदि हुन्ज "मन्-पम्पोश" 1998
- 4- श्रीमती बिमला रैना हुँन्ज रिशी "मॉल्यून म्योन" 1998
- 5- कमला रेनाई हँज ज्ञान-प्रकाश 1995
- 6- तुँ श्रीमती गिरजा कौल सुँन्ज "गुरु दक्षिना" 2001

पँरिथ छु म्य बासान कि ग्यान् सँदरकि बदि छि भक्ती सुन्दयन लोलह आल्वन हुन्ज पोतग्रँजा जानान् सुन्ज माय वुजहनावान। हृदयिकिस लोलँ बागस छि हीपोश फोलान तुँ यार सुन्द शदीद इहसास छु मन्स सकून बखशान। दम्फुटि कोमँकि जिन्द आसनुक छु योहय सुँबूत।

(ऐ)

बासान छु श्रीमती गिरजा कौल छि पजिपाँठि तथ मुकामस प्यट् वाचमँच यथ् वुन्दक्षँ गट् छि प्रजलान तुँ इहसास हक छु पजर गाशहरावन्ँ खातरह जजबातन वुतुशँ दिवान। सुँ छ अनमोल मुख्त् फल्यन मालह करान तुँ लीला ग्यवान। अमिसन्ज् वारयाह लीलायि छि गुरुवन्दनायि सँअती वाबास्त्। हर ति छु च्वपारी नप्-नप् करान नपान। तुँ हरी ति द्वालह मारान। क्यँन्ह लीलायि छि मॉनी इतिबारह बेझोड़। मिसालि पाँठि

- (क) प्रभात आव मँच दारि बरन्यन तॉरि  
(ख) यि छु संसार नापायिदार  
(ग) लालह ज़ाव लुलि मँन्ज ललहनोवुम  
(घ) ललहनावुन छु ओमकार  
(न) पोशिरँ छि म्योन यावुन

म्य् छि अमिस इयकहबजि काँशिरि कोरि हँनदिस जेहनी बजरस प्यट् फखर इशवर बूँजिन हलम यँयिनस नूरँच्यव् जूच्व साँति बँरिथ।

डा० भूषन लाल कौल  
प्रोफेसर हिन्दी काशमीर विश्वविद्यालय  
बरनाई, जम्मू



(ओ)

## बागनय

1. अज रोज साने सतग्वरु म्याने.....
2. ग्वर दीवुं लगयो पम्पोश पादन.....
3. होश दिम शिवो हा ग्वरुं दीवो.....
4. गादुल पननुय सीर छुनुं बावान.....
5. चलख यिनुं त्रैविथ कीवल मे मॉजे.....
6. ग्वरु ग्याने छय च्य सीरी.....
7. सतग्वरुं म्यानि लाल हो आमो.....
8. ग्वरुं पादन मॉज करय गुरुं—गूर.....
9. ओंम, ओंम, ओंम, ओंम छोर.....
10. हर हर हर हर हरी हरे.....
11. ग्वरुं दीवुं यिखना यपौर्य.....
12. रुम—रुम राम बोलन.....
13. वनया क्वंगपोश किनुं कोसतूरी.....
14. आदि दीवस कर गुल्य गॉन्डिथ प्रणाम.....
15. पोश छुख पोश मो बन.....
16. प्रभात आव मुचर दारि बरन्यन तौर्य.....
17. संसार भ्रम तुं बाँज्यगार.....
18. सत ग्वर टोठ साधा.....
19. यि छु संसार नापायदार.....
20. प्रजलख सिरिं ह्यु मन डंजि थाव.....
21. ग्वरुं चाव मँसती हुंद मे दामो.....
22. ग्वरुं रो टमय चोन दामानो.....
23. रामायण राम—राम बोलुंनावन.....
24. पूजा करतो या पर न्यमाज.....
25. कुकिले वो ननम कृष्णुं वनवुनये.....
26. लालुं जाव ल्वलि मंज ललनोवुम.....
27. रथि खार प्रभात वेसिये.....

(ओ)

28. गणपत वंदेहय तन मन तुं प्राण.....
29. गवरुं शब्दा छुय जबर.....
30. मथरायि वजान बाजे.....
31. म्बखतुं द्राव गौरस नुं पय.....
32. बब वनसा किनुं यार.....
33. बोमवारि बोम कास छुख मंगल.....
34. टाठि कृष्णो, म्यानि स्वनुं कन दूरो.....
35. कृष्णो, कृष्णो, शामुं रंग कृष्णो.....
36. कृष्णो वरतम रुंखमन बुं प्रारान.....
37. कृष्णो लॉल वॅजनस बुं माये.....
38. पय छम न माँजे कर बुं जायस.....
39. लॉलि छय माँन्जिराथ वुजुंनावुन.....
40. ललुंनावुन छु ओ मकार.....
41. सखरा कर चुं साँरुँच वे सिये.....
42. पोशि थर छु म्योन यावुन.....
43. माँज क्या आँसुँस क्या बनेयस.....
44. ममता मो ह, माया जीवुं फंद.....
45. हा जीवुं क्याजि छुख, जाथ मँदछावान.....
46. ज्ञाँनी गवर म्योन, मसताना.....
47. कनुं दूर अँलरान तंबलावान.....
48. अछिपोश व्यनुंपोश, लागन नुं बो.....
49. मुरलीधर छारान.....
50. यँख ना चँ योर सतिये.....
51. गवर म्यानि मस्तान् यित् सालो.....
52. मोह छु अन्यगुट माया अन्धकार.....

(1)

अज रोज़ साने सतग्वरुँ म्याने ।  
सतग्वरुँ म्याने सतग्वरुँ म्याने ॥

ये'लि यिख सीनस सूँत्य बुँ सावथ ।  
लोचि तल थवथ, कौन्सि नो हावथ ।  
वनया दूरफलि, किनुँ दुरदाने ।  
सतग्वरुँ म्याने, सतग्वरुँ म्याने ॥

स्वनिदार मंजुला, कूताह शूबिदार ।  
येलि यिख, तेली सपँधम दीदार ।  
यिख नय तुँ, मंजलिस बे' हि कुस यि प्राने!  
सतग्वरुँ म्याने, सतग्वरुँ म्याने !!

करतम अनुग्रह, छलुँहा मॉलुँ मन!  
न्यरमल मनुँ सूँत्य, श्रोच्यम छू' यँट तन!  
तन मन छलुँहा, ग्वरुँ द्वैयटिवाने!  
सतग्वरुँ म्याने, सतग्वरुँ म्याने ।

परम्दामुक दार, हावतम यती ।  
सतसंग अमृत, चावतम यती ।  
जँर छस बोर्जुँ क्या, सतसंग माने ।  
सतग्वरुँ म्याने, सतग्वरुँ म्याने ॥

अज्ञानी छस, ज्ञान हेछै नावतम ।  
ख्यनुँ-ख्यनुँ, गीता, सार परनावतम ॥  
परहा गीता, अँछ छम काने ।  
सत गवरुँ म्याने, सत गवरुँ म्याने ॥

आशर्चय छुम गछान वुछिथुँय काया ।  
बोय वनान बाँयिस, ज्ञानथ नुँ बाया ॥  
जगतुक यि रिशताह, दय पाँनु ज्ञाने ।  
सत गवरुँ म्याने, सत गवरुँ म्याने ॥

रायि रायि बअगरान, छख जायि जाये ।  
ज्यदह छख बअगरान, यस छि दय माये ॥  
श्राना करहा, गंगा वाने  
सतगरु म्याने, सत गवरु म्याने

आछुर गुर छस, जानुँ क्या सतँ संग ।  
गिरि कर अनुग्रह, हावुस पनुन रंग ।  
चोन म्योन रिशताह, कांह ति नो ज्ञाने ।  
सत गवरुँ म्याने, सतँगवरुँ म्याने ॥

(2)

ग्वर दीवुँ लगयो पंपोशि पादन ।  
साधन सूँत्य करनावतम ज़ान ॥

साध कति ज़ाने बाँय तय बांदव ।  
साधव रो' टमुत यादव तुँ मादव ॥  
माधव प्रावुन, पकनुय छु वादन ।  
साधन सूँत्य करनावतम ज़ान ॥

साधेँ सीवा छय, मीठ तय क्रीठ ।  
साधेँ सीवा छय, स्यठहुँय ज़ीठेँ ॥  
साधेँ सीवा कँर, तँम्य प्रहलादन  
साधन सूँत्य करनावतम ज़ान ॥

साध छुय दँरिथ, ग्वरुँ दयाये ।  
साध छुय लॉरिथ, ग्वरुँ कृपाये ॥  
पालना छुय करान, ग्वरुँ संवादन ।  
साधन सूँत्य करनावतम ज़ान ॥

साधव काँचाह, ने' न्दया ह्यचमुँच ।  
मँछमुँच तनि छख, म्यँच तय सूर ॥  
पान लारुँनावान वगव्यन तुँ रादन ।  
साधन सूँत्य करनावतम ज़ान ॥

साधुं सतसंग छुय, दुरलब मेलुन ।  
खेलुन छुय, कालुं सर्पन सूँत्य ॥  
व्यनुं पोशि फुतराहँ लागुँन्य पादन ।  
साधन सूँत्य, करनावतम ज्ञान ॥

साध छि ज़ालान त गालान पान ।  
साध कति ज़ाने, मान अपमान ॥  
कन थावान तिम, लोलुँक्यन नादन ।  
साधन सूँत्य, करनावतम ज़ान ॥

मंगुँ कस, दियि कुस, धुतमुत नुँ कौँन्से ।  
पननुय पाना सौ, रमुत म्य वाँसे ॥  
पायस प्यतुँ च़य, वुनि छुय आदन ।  
साधन सूँत्य, करनावतम ज़ान ॥

कुलिसयछु पननुय, म्यवुँ फुटरावान ।  
खाकस सूँत्य छुस मिलुँनावान ।  
पतुँ-पतुँ दोरान, तिमन शहजादन ।  
साधन सूँत्य कनरावतम ज़ान ॥

साध छिय टाढ्यन, भकेन पालान ।  
गालान ज़नमुँक्य, दुख तय दाँदय ॥  
गिरजा छांडान, ज़्ययदुँ खोतुँ ज़्यादन ।  
साधन सूँत्य करनावतम ज़ान ॥



(3)

होश दिम शीवो, हा ग्वेरु दीवो ।  
हा ग्वरुँ दीवो, हा ग्वेरु दीवो ॥

चुँय म्योन मोल मॉज, बोज़ान बोल बोश ।  
त्वकचारुक दम, खारान कूत बोश ॥  
बुजरुक बननुय, वननुय नुँ ज़ीवो ।  
हा ग्वरुँ दीवो, हा ग्वरुँ दीवो ॥

जामुँ छस वलान तय, पामुँ छस बोज़ान ।  
अन्य छस डांवाडोल, छस रोज़ान ॥  
ललि हुँन्ध जामुँ वल, पॉनुय दीवो ।  
हा ग्वरुँ दीवो, हा ग्वरुँ दीवो ॥

सीर छस नुँ बावान, दाँदय छस नुँ हावान ।  
दादयँन अँन्दरी, वॉरु-वॉरु सावान ॥  
जखमन, सलाखन, औषध चुँ दीवो ।  
हा ग्वरुँ दीवो, हा ग्वरुँ दीवो ॥

क्या करुँ ये' ति बो, क्या करु तति बो ।  
येति तति करुँ क्या, यमसुँम ड़रु बो ॥  
पापियन तारनहार छुख दीवो ।  
हा ग्वरुँ दीवो, हा ग्वरुँ दीवो ॥

दिलची धडकन, चे' य सँत्य रोज़ान ।  
काया कौफिर, कारण छि नेरान ॥  
मँशराव लल तुँ कल पानय चुँ जीवो ।  
हा ग्वरुँ दीवो, हा ग्वरुँ दीवो ॥

काम क्रध गालतम, लूभ मुह जालतम ।  
विभीषण मे पालतम, सुदामस मे' तारतम ॥  
नावि म्यानि नम रठ, दमुँ सान दीवो ।  
हा ग्वरुँ दीवो, हा ग्वरुँ दीवो ॥

क्वसुँ म्यौन्य लँर तय, क्वसँ म्यौन जाय-छय ।  
कुस म्योन शुर तय कस म्यौन माय-छय ॥  
शोलान चाने लरि मंज, बुँ दीवो ।  
हा ग्वरुँ दीवो, हा ग्वरुँ दीवो ॥

पौपी संसार, च़ानान छुय लार ।  
मानान छुय नुँ हार, छारान छुय नुँ तार ॥  
गिरजायि नावितार, हार अख नुँ दीवो ।  
हा ग्वरुँ दीवो, हा ग्वरुँ दीवो ॥

(4)

गाटुल पननुय, सीर छुनुँ बावान ।  
ग्वर छुनुँ कॉन्से, परुँ पावान ॥

मनुँकिस ऑनस, खय क्याजि खारान ।  
यि हा छुय दयि सुंद, र्वनि मंजोल ॥  
भाग्यवान मँजलिस, त्वलि ललुँनावान ।  
ग्वर छुनुँ कॉन्से परुँ पावान ॥

मूडन मंज चुँ कवुँ छुख नुँ बारान ।  
छारान क्याजि छुख, स्वयि मंज पोश ॥  
जग तुँ प्रो,न कोना छुख, चुँय प्रजनावान ।  
ग्वर छुनुँ कॉन्से, परुँ पावान ॥

क्वसंग त्रावुन, सतसंग प्रावुन ।  
सतसंग प्रावुन, ग्वरुँ व्वपदीश ॥  
सतसंग ज्ञानुक, अमृत छु चावान ।  
ग्वर छुनुँ कॉन्से परुँ पावान ॥

राजजुँ हसँह ऑसिथ, काव क्याजि बनान ।  
सनान कोना छुख, मनुशि जंनमस ॥  
पँतिमी पाफँ कोना, छुख, चुँ मँशरावान ।  
ग्वर छुनुँ कॉन्से परुँ पावान ॥

दुख दादयन छुय चे, हलम दारुन ।  
जिदय मारुन, पननुय पान ।।  
कर्मव किन्य छुख, दूख-स्वरव प्रावान ।  
ग्वर छुनुँ कॉन्से परुँ पावान ।।

वीद तय पुराण, जीवस छि तारान ।  
छारान छिय तिम, जय तय दय ।।  
दय छुय कुनुय तय, वय छु बागरावान ।  
ग्वर छुनुँ कॉन्से, परुँ पावान ।।

भ्रमा, वेषण मेहेश, चे' य छिय छारान ।  
दारान छिय तिम, ब्योन-ब्यो' न रुप ।।  
सूहम शब्दा, छिय दो' ह रावान ।  
ग्वर छुनुँ कॉन्से, परुँ पावान ।

ग्वरदार छारुन ग्वरम्वख दारुन ।  
ग्वरदारस व्यठ मारुन पान ।।  
“गिरजा” रिदनुँय छय गिदँनावान ।  
ग्वर छुनुँ कॉन्से परुँ पावान ।।

(5)

चलख यिनुं त्राँविथ कीवल मे' मॉजे ।  
बरुँ गॉमुँच छसय, मसवल मॉजे ॥

दिलुँकी दुख तुँ दौँदय, मॉज कस बावय ।  
तीर छुम आमुत, सीनुँ कस हावय ॥  
जखमन पीर करु, पानय च मॉजे ।  
बरुँ गॉमुँच छसय, मसवल मॉजे ॥

चँय छख मॉज तय, चँय छख म्योन मोल ।  
दादि चानि माता, गोमुत छुम होल ॥  
हरदुँय ज़रदी, लँजमुँच मे' मॉजे ।  
बरुँ गॉमुँच छसय, मसवल मॉजे ॥

सम दृष्टी हुँन्ज़, सम्पती प्रॉवथँ ।  
सम व्यवहारुँच, ममता हॉवथ ॥  
सम आहारुँच, वथ हाव मॉजे ।  
बरुँ गॉमुँच छसय मसवल मॉजे ॥

शुर्य बाँच रँछथक, छख करान व्वपकार ।  
चानि आँही सूँत्य मेलान छुम तार ॥  
खरुँ—खरुँ करतम दरदिल मॉजे ।  
बरुँ गॉमुँच छसय मसवल मॉजे ॥

भजन छख बोजान, भजन बोजुंनावान ।  
दीवी रुप काँत्याह, छख हावान ॥  
राग छुय, त्यागुं, भावनायि हुंद माँजे ।  
बरुँ गाँमुँच छसय मसवल माँजे ॥

दुँय छख शारिका, चुँय छख रागिन्या ।  
चुँय छख अंभा, चुँय छख ज़ाला ॥  
दुर्गा छख चुँय, दरदिल माँजे ।  
बरुँ गाँमुँच छसय, मसवल माँजे ॥

ब्राँत्य छिम गछान माँज चाने बजरुँक्य ।  
बाँत्य छिम गछान माँज चाने थजुँरुक्य ॥  
थजुरँच नजरा, करतुँ मे' ति माँजे ।  
बरुँ गाँमुँच छसय मसवल माँजे ॥

दूरयर चोन छसन, माँजय चालान ।  
चानि दादि माता, पीर कम पालान ॥  
असि कुस, लसि कुस, बसि कुस माँजे ।  
बरुँ गाँमुँच छसय मसवल माँजे ॥

बखशिथ गछि, अँमिस, टाँठिस लालस ।  
आँही करतय, सनतय हालस ॥  
गिरि ग्वर छार्यम तुँ गार्यम मे' माँजे ।  
बरुँ गाँमुँच छसय, मसवल माँजे ॥



(6)

ग्वरुँ म्याने छय च़े सीरी छय च़े' त्रफती बूजुम ।  
नालँ लायान नोतवाना पैगामा मे सूजुम ॥

बेकस छस बेमारा, कडु-किथुँ वॉन्टिस गूज ।  
मॉज म्याँनी ! वनतुँ पानय लागि कथ तरंगुँ रो' स जूज्य ॥  
न्याय बोज़हम सायि थवहम, कल मे' काँचाह रुजुम ।  
नालँ लायान नोतवाना, पयगामा मे' सूजुम ॥

सतुक शब्दा ललुँनोवुम, कनव बूजुम सूहं सू !  
मनुक मल कोताह मे' पोजुम मनस आयम गांदि हँज़ भू ॥  
मन सोवुम तन पोवुम, अदुँ दय हा मे' पूजुम ।  
नालँ लायान नोतवाना, पैगामा मे' सूजुम ॥

पानय पानस छुय तेलुन, मेलुन खाकस सूँत्य ।  
लूकुँ गेलुन छुय नुँ च़ेनुन, मेनुन नुँ क्रेंजिल्यन पोन्य ॥  
क्रय कर्य-कर्य शिव पोलुम शिव आलव मे वुजुम !  
नालँ लायान नोतवाना, पयगामा मे सूजुम ॥

शिव पूज़ा सिखम तुँ क्रूँठ, मूड गिरि चायम मे' तुर ।  
ग्वर च़रनारब्यंद स्वरुन, मर्य-मर्य ति नो मरुन ॥  
मेंड़ि बापथ पान मारान आवाज़ा मे' बूजुम !  
नालँ लायान नोतवाना, पैगामा मे' सूजुम ॥

अहम त्रावुन शुर छु सावुन, सावुन पादर सुँह ।  
मुह माया छुय नुँ हावुन, यिहा छुय नारुक दुँह ॥  
अनजानी, बेईमानी पपुँन ब्रोंतुँय म्य् लूजुम ।  
नालँ लायान नोतवाना, पैगामा म्य् सूजुम ॥

(7)

सतग्वरुँ म्यानि लोल हो आमो ।  
होल गोम सूज्यमय पयगामो!!

ग्वरुँ शब्दाह छस, ललुँनावान ।  
ग्वरुँ घ्यनॉनुच म्यँच, मलुँनावान!!  
प्रभातन वँथिथ स्वरुन, रामुँ रामो!  
होल गोम सूज्यमय, पयगामो ।।

नंगुँ छस न्यथुँनँन्य, ननुवोरुय ।  
मंगुँ कस पानस, राह मे सोरुय !!  
ललि हुँन्ध पॉठ्य वलतम जामो ।  
होल गोम सूज्यमय पयगामो !!

यिमहा मॉजय छम क्या बूल ।  
तुलँमुलि जालय रतन दीप जूल ।।  
वति वति परहा शाम् शामो ।  
होलगोम सूज्यमय पयगामो ।।

काम, क्रूध गालुन स्यठा दुशँवार!  
लूभ, मुह जालुन अथस हयोन नार !!  
पर्य—पर्य कँह ना आम, अंजामो ।  
होल गोम सूज्यमय, पयगामो ।।

हेजि कडुँनावान, शुर्य सुँन्ध पॉट्य ।  
मँशरावान छुम जिगर तय टॉट्य ॥  
मच गॉमँच दियम कुस मे पामो ।  
होल गौम सूज़मय पैगामो ॥

पान ग्रटअ छुम कडुन दय पालुन  
क्षान सात्य गुरि—सवार व्यसँरावुन  
चालुन छुय व्यह त् नार पानो ।  
होल गोम सूज़मय पैगामो ”

मॉलुँ मन छुनुँ, कुनि डंजि रोज़ान ।  
साफ करुँहा छुनुँ पय सोज़ान !!  
पय छारान छस शहँरु गामो ।  
होल गोम सूज़्यमय पयगामो !!

ववुँ क्याह लोनुँ क्याह, क्याह छम खबर ।  
अँन्य छस ज़ानुँ क्या स्वय तय बबर !!  
प्वखतस बनान क्याजि, छुम खामो ।  
होल गोम सूज़्यमय, पयगामो ॥

गिँदुँनावान, छुम छेपि छारे !  
गाह दरवाजुँह तुँ, गाह दारे ॥  
वनया कृष्ण, किनुँ बलरामो !  
होल गोम सूज़्यमय, पयगामो ॥

कारन तार दिनह वोल, दीवा  
क्याह करि ब्यनि बोय क्याह, जीवा ।।  
दाम् दाम् चाव, अमृत दामो ।  
होल् गोम सूज़मय पैगामो ।।

दय पालना छय, ज़रह कासन्य  
माँज मास छय च्य, कुनी बासन्य  
चलवनिस गुरिस रटन्य छय, लगामो ।  
होलगोम सूज़मय पैगामो

ओम छारनुक काँह वनतम व्पाय  
गिरि दित्तुँ दाता, छपंयनुँच जाय  
गयान विज्ञानुक च् व्य्मानो !  
होल गोम सूज़मय, पयगामो ।।

(8)

ग्वरुँ पादन माँज करय गूरु—गूर।  
दर्शुन दितम हावतम पनुन नूर।।

गुरु माहराजन, दिचनम डॉल्य !  
चंदुँ माता चोन, जांह गव नुँ खॉल्य !!  
लक्ष्मी रुजुँय नुँ, चे' निशि दूर !  
ग्वरुँ पादन माँज, करय गूरुँ—गूरु ”

लगयय माँज, पंपोशि न्यँतरन !  
लगयय माँज, चान्यन प्यतरन !!  
जन्म धुतमुत छुहोय, चेय परि पूर !  
ग्वरुँ पादन माँज करय गूरुँ—गूर

रुँच वथ माता, छख हावान।  
बँखत्यन कोताह, नूर त्रावान।।  
सावान दादयन, कासान त्रूर।  
ग्वरुँ पादन माज करय गूरुँ—गूर।।

रछान सारिनुँय छख, शुरेयन हुँन्य पॉठ्य।  
बँखुँत्य छिम साँरी, टाठि खोतुँ टाठ्य।।  
सरस्वती छय वनान, स्वरगुँच हूर।  
ग्वरुँ पादन माँज, करय गूरु—गूर।।

छटांगस म्याँनिस, बनोवुथ सेर ।  
शापन खोचान छुम गछान चेर ॥  
दितम माँज मे' ति, पननुय ह्यू सबूर ।  
ग्वरुँ पादन माँज करय गूरुँ-गूर ॥

चय छिहम क्रोन तय, चँय छिहम कबील ।  
मे ति वन्य वनतम तरनुक सबील ॥  
तरुँ किथुँ नावि छुम फुटँमुत खूर ।  
ग्वरुँ पादन माँज करय गूरुँ-गूर ॥

धुतथम माँज, ग्वरुँ शबदुक ज्ञान ।  
दोरमय छोन हलम, प्रोवुम वरदान ॥  
दक्षिना दिमय क्या, चाँनी बुँ कूर ।  
ग्वरुँ पादन माँज, करय गूरुँ-गूर ॥

पाप-शाफ कासान, रछान दँलिस तल ।  
ग्वरुँ सीवायि हुंद, छख दिवान बल ॥  
गलती कांह छम, तुलतम मूर ।  
ग्वरुँ पादन माँज, करय गूरुँ-गूर ॥

शोगंय-शोगंय माता, आयस तंग ।  
दयि नावुँच छम, अँन्दरी मंग ॥  
कुंभकरनस प्यतम, न्यँन्दरे चूर ।  
ग्वरुँ पादन माँज, करय गूरुँ-गूर ॥

तन छम साफ, तय मन छुम क्रुहुन !  
काचें जूनि लोगमुत, कोताह ग्रुहुन ”  
बखशन हार छख, गालतम गरुर।  
ग्वरुँ पादन माँज: करय गुरुँ—गूर।।

रावुँ राव्यम मा,ज दोह तय रॉचुँय।  
मॅशरॉविम माज, शुर्य तय बॉचुँय।।  
छेटिवोन्य चोन छुम, अमर्यतुँ दूर।  
ग्वरुँ पादन माँज करय गुरुँ—गूर।।

रंगुँ—रंगुँ जामुँ, पूरिम वॉन्से।  
असली रंग अथि, आव कॉन्से।।  
चिटुँ रंग त्रावान, अंतिम नूर।  
ग्वरुँ पादन माज, करय गुरुँ—गूर।।

गालान छख माँज, भूत तय प्रीत।  
भॅकत्यु छिय ग्यवान माँज, ज्ञानुँक्य गीत।।  
त्रेशना करान छख, जीवस दूर।  
ग्वरुँ पादन माँज करय गुरुँ—गूर।।

पाँपी गिरजा, पाफ छस करान।  
लूकुँ हुँन्ज माया, बे' बि छस बरान।।  
गाटुल ग्वर छुम, क्याजि मलुँ सूर।  
ग्वरुँ पादन माँज करय गुरुँ—गूर।।



(9)

ओंम, ओंम, ओंम, ओंम छोर ।  
ग्वर दीवुँ मुच़राव तोर ।

कँरमस, व्यनय तय प्रनय !  
लॉग्यमस, हिय तय व्यनय ॥  
गंगा करान छस, शोर ।  
ग्वरदीवुँ मुच़राव तोर ।

छारन, क्वहन तुँ बालन ।  
गिंदन सुँहन तुँ, शालन ॥  
छनंहा ख्वरन, पुलहोर ।  
गवरदीवुँ मुच़राव तोर ॥

नंदी छुय सूँत्य सूँती ।  
नादस सूज्यमय में कँती ॥  
नागराज ह्यथ, यितुँ योर ।  
ग्वँरु दीवुँ मुच़राव तोर ।

तला यितुँ सोन, सालय ।  
सती वनिय, पनुन हालय ॥  
यिनुँ मशी, गणेष जी तोर ।  
ग्वर दीवुँ मुच़राव तोर ॥

बुमैं ँकरिथ, छु आसान ।  
मनि हुन्द, कूप कासान ॥  
दिलस प्यठ छुम, अख बोर ।  
ग्वर दीवुँ मुचराव तोर ॥

सती ज़ोलुन, ताल्युन !  
धुतनस नुँ यिनुँ, माल्युन ॥  
कोरनस बंद, तत्युक तोर ।  
ग्वरदीवुँ मुचराव तोर ॥

द्रायि दीवी तुँ, दीवता ।  
परान छिय तिम, गीता ॥  
शिव द्वार तिमव, ग्वडुँ छोर ॥  
ग्वरदीवुँ मुचराव, तोर ॥

राख्यस छुख, च गालान ।  
बँखत्यन छुख, च पालान ॥  
नारद जियन, चे निश होर !  
ग्वर दीवुँ मुचराव तोर ॥

करुँ क्या छस बुँ, ननुँवोर ।  
दरनुक छुम नुँ कांह, जोर ॥  
खोतमुत छुम गोब, बोर ।  
ग्वरदीवुँ मुचराव, तोर ॥

करिमस काँचाह, लटय ।  
चाजम काँचाह, ऋय ॥  
ओस कोताह, में सुय लोर ।  
गवर दीवुँ मुचराव तोर ॥

गिरजा छस बुँ, नादान ।  
वनुँ क्याह छस बुँ, अनजान ॥  
सुँहस बासान छुम, ब्रोर ।  
गवर दीवुँ मुचराव तोर !!

(10)

हर हर हर हर हरी, हरे।  
ग्वरुँ नाव स्वरतो, गरि गरे॥

घरअ बार बापथ, ओश मो त्राव !  
यिहा छुय आँखरस खोरि रुस नाव !!  
खोरि रुस नाव तार, त्रेशना मरे !  
ग्वरुँ नाव स्वरतो, गरि गरे !!

वाँन्स छय आँमुच, छुख ग्वब्योमुत।  
दयि नाव छुय नो, जांह सन्योमुत॥  
सँनिराव दयि नाव, मेलीय घरे।  
ग्वरुँ नाव स्वरतो, गरि गरे॥

संसार बासान, मृगत्रशना।  
तंग आस कर्य-कर्य, जंग जेशना॥  
येम्य नुँ येति धुत तति क्या करे।  
ग्वरुँ नाव स्वरतो, गरि गरे॥

जियाफत छुख ख्यवान शोकुँ सानय।  
कँठ कँडय-कँडय जालान पानय॥  
नफुच छुय शाहमार, सावुन लरे।  
ग्वरुँ नाव स्वरतो गरि गरे॥

युस छुय न्यर्धन, तस छिय मारन ॥  
शुर्य तुँ बाँच तस नाय, छिय छारन ॥  
प्रावान सु मुकती, युस सारिनुँय खरे ।  
ग्वरुँ नाव स्वरतो, गरि गरे ॥

पार पननी काँचाह, छम टाँठ ।  
चोर पांछ ज्यवरिथ, बनेमुँच हॉन्ठ ॥  
कँल्य तुँ ज़रँ बनेमित्य, पननीय घरे ।  
ग्वरुँ नाव स्वरतो गरि गरे ॥

कटुँ अँछ कँर्य-कँर्य, बेमारा ।  
तुलरे गनँसँय छा, शुमारा ॥  
दूँदुँ शुर्य बोजनावान, छिम फरे ।  
ग्वरुँ नाव स्वरतो, गरि गरे ॥

असलुँक्य शुर्य तुँ बाँच, मेलनय तँती ।  
भ्रम त्राव प्रावरव, परमय गँती ॥  
प्रभातन वोथान छय, हारि तय चरे ॥  
ग्वरुँ नाव स्वरतो गरि गरे ॥

गिरजा मार्यज्यन, मरनुँ ब्रौँठुँय ।  
क्या क़रयम वोरअ, तय क्या टोठय ॥  
साँन्य दाँध, सोन ग्वर, जाँह नो ज़रे ।  
ग्वरुँ नाव स्वरतो, गरि गरे ॥

(11)

गँरु दीवुँ यिखना, यपॉर्य ।  
चरनन लगय बुँ, पॉर्य-वॉर्य ॥

जन्म कोताह, शूबिदार ।  
करान क्याजि, मारोमार ॥  
जेनि कति बाज, हॉर्य-हॉर्य ॥  
चरनन लगय बुँ पार्य-पार्य ॥

लगि कति जीवस, तार ।  
छारान छु, नार तय मार ॥  
तरि कति सु, जीव मॉर्य मॉर्य ।  
चरनन लगय बुँ पार्य-पार्य ॥

मरुन गव नुँ, शाह नेरुन ।  
मरुन गव, जिंदय पॉरुन ॥  
छारुन छु, पंतु लॉर्य-लॉर्य ।  
चरनन लगय बुँ पॉर्य-पॉर्य ॥

गवर शबदुक, कोर में ध्यान ।  
जोनुम नुँ, मान अपमान ॥  
सरस्वती दिवन छि, दॉर्य-दॉर्य ।  
चरनन लगय बुँ पॉर्य-पॉर्य ।

तारन वोल, तारान !  
तरन वोल, दय नुँ छारान ॥  
तारिह्यम लगस, पौर्य-पौर्य ।  
चरनन लगय, पौर्य-पौर्य ॥

अँन्य छस परुँ कति ज्ञान ।  
स्वरुँ कति दयि सुंद ध्यान ॥  
गिर पकान छस बुँ सौर्य-सौर्य ।  
चरनन लगय पार्य-पार्य ॥

(12)

रुम-रुम राम, बोलन ।  
श्री राम-राम, बोलन ॥

दुंबुख दितुम, वुछुम श्री राम ।  
वोननम ग्वरस कर, प्रनाम ॥  
ग्वर मनुक गंड छु, तोलन ।  
रुम-रुम राम बोलन ॥

करान क्याजि, मंगुं मंगय ।  
छारतो, सत संगय ॥  
ज्यथ यतीम छिय, डोलन ।  
रुम-रुम राम बोलन !!

म्वय बैर्य बैर्य छु प्यालन  
बोरमुत छु पानुं लालन  
चनुं वॉल्य छिय सॉलन  
रुम रुम राम बोलन

तगियेय थवच साधु संग ।  
बरान छुय रंगन मंज रंग !  
जूग्य बरान छुय जोलन !  
रुम-रुम राम, बोलन !!



ब्रह्मुन छु थदि खोतुं थोद !  
जियाफत खेयि या होद !!  
स्यो द साँदु, छुय शोलन !  
रुमँ-रुमँ राम बोलन !!

ववुँ यिय नेर्यम में तीय !  
स्वय ववुँ नेरि कति, हीय !!  
लाल बासन छु, कोलन !  
रुमँ-रुमँ राम बोलन !!

घरि छुम, ग्वर छारुन !  
रामुँ रुम, छुय दारुन !!  
लूम त्राव गछ मुँ मॉलन।  
रुमँ-रुमँ राम बोलन !!

कौशेलाई सात्य थव ज़ान  
राम ओस टोठ सन्तान ।।  
भ्रॉन्त गछिथ बरनँ खोलन।  
रुमँ-रुमँ राम, बोलन

सीताई लव कुश गब्बर  
रामन ह्यचख, नो खब्बर  
वालमीकी छुनेँ वोलन !  
रुमेँ-रुमेँ राम, बोलन

त्यागी सीता, छोरुन न राम  
राम बलिदानी, मोरुन काम  
सीनेँ दोरुन हा गोलन ।  
रुमेँ-रुमेँ राम, बोलन

राधाई दूरेर चोल  
जसुदाई मोह कूत गोल  
सूर फौलान छुख मॉलन ।  
रुमेँ-रुमेँ राम, बोलन

गिरजाई ओमं, सँनिथ गोम !  
चॉवनस ओम तुय, ज़ोम !!  
मँच कँरनस बुँ लोलन ।  
रुमेँ-रुमेँ राम बोलन ।।

(13)

वनया क्वँगपोश, किनुँ कोसतूरी ।  
हूरी लगयय, अथ नूरस ॥

लेखहा माजय, ओसुम न ज्ञान ।  
परुँहा मॉजे, ओसुम नुँ ध्यान ॥  
सरस्वती पिलँनाँवथम, मे चूरि चूरी ।  
हूरी लगयय, अथ नूरस ॥

सोम्बरोवमुत रोज़ान, मॉज यती ।  
घुतमुत छुमनुँ क्या मेल्यम तती ॥  
पाफ—शाफ हरनावान चुँ तुलुमूरी ।  
हूरी लगयय, अथ नूरस ॥

दूख लद मंगान छिय, दाद्यन दिलासँ ।  
दिख क्या, वलान छख, ज्ञानुक लिबासँ ॥  
अंद वॉतिनय, चे हेथ पनुन्य, जूरी ।  
हूरी लगयय, अथ नूरस ॥

नूर छुय वसान, ज्ञान छख बोजुँनावान ।  
जीवन असलुँच, ज़ान, करुँनावान ॥  
बँखत्यन बासान, छख चुँ शाह—नूरी ।  
हूरी लगयय अथ नूरस ॥

वातान छस नुँ मॉज, ज़ांह गरुँदारस ।  
पोशान छस नुँ मॉज, पननिस यारस ॥  
वनतम अचुँहय, शॉन्दि तय खूरी ।  
हूरी लगयय, अथ नूरस ॥

दिल फुटिमित्य, छेपि-छेपि छिय छारन ।  
ग्वरु आदेशस, छोन्य हलम दारन ॥  
औषध बाँगरान, छख चु, पूरि-पूरी ।  
हूरी लगयय, अथ नूरस ॥

दाँघ लदनय छख चुँ, दाँघ कासान ।  
बखत्यन सिरिँ चँन्द्रम, चुँय, बासान ॥  
अंग हीनन, अन्थन बासान, चुँ लूरी ।  
हूरी लगयय, अथ नूरस ॥

वनुँ क्या, लेखुँ क्या, क्या छम खबर ।  
मनुँचे वारि द्रायि, ज्ञानुँच बबर ॥  
कनि तुँ कछ, कडनावतम डूरि-डूरी ।  
हूरी लगयय, अथ नूरस ॥

गिरजा बोज़ान, साज़ तय सोज ।  
ग्वरुँ दीवुँ बोज, अख राथा रोज ॥  
नज़दीक आँसिथ छख चुँ दूरि-दूरी ।  
हूरी लगयय अथ नूरस ॥

(14)

आदि दिवस कर, गुल्य गॅन्डिथ प्रनाम ।  
जपो राम, जपो राम, राम राम राम ॥

आदि दीव छुय वनान, छुख ओमकार ।  
दय ऑसिथ मंगान कीवटस तार ॥  
भिलनी मंगान छुख, खामि खोतुँ खाम ।  
जपो राम, जपो राम, राम राम राम ॥

राम छुय वीद तय राम छुय पुरान ।  
ब्रमा, वेषण, महेश करान छिय ध्यान ॥  
विभीषण वनान, अन स्वपुन मे अंजाम ।  
जपो राम, जपो राम, राम राम राम ॥

स्यपिन्य सावख बनख सरदार ।  
दय छुय सँत्य, खोचिय शाहमार ॥  
सीता वनिय राम, राधा चे श्याम ।  
जपो राम, जपो राम, राम राम राम ॥

क्या करि शुर तुँ बाँच, क्या करि लॅर ।  
शबरी राम-राम नावुँ, सँत्य तॅर ॥  
म्वल छुय त्यूताह, छुय नुँ कांह दाम ।  
जपो राम, जपो राम, राम राम राम !!

श्री राम मेलिय, बन हनुमान ।  
सावित्री बन, मंगुन वरदान ॥  
ऑरी छि दुनँवय, कृष्ण तुँ बलराम ।  
जपो राम् जपो राम् राम राम राम ॥

आकाश तय पाताल, छुख चुँय ।  
दोह तुँ राथ चुँय, गालान मनि दुँय ॥  
दशरथ वनान, छुम टोठ राम नाम ।  
जपो राम, जपो राम, राम राम राम ॥

राम जी दिवान, माजि कैकी दिलास ।  
भांवी अटल, वलुँ कति अँतलास ॥  
त्योगमुत ओसुन, क्रूध तय काम ।  
जपो राम, जपो राम, राम राम राम ॥

ऑखरस रावणन, राम सोरुय ।  
पॉपी आसिथ, सागरस तोरुय ॥  
राम-राम तारान, खास तय आम ।  
जपो राम जपो राम, राम राम राम ॥

नफुँच रटुन कचि तय, मन मारुन ।  
ब्रहमण छुख, मामस नुँ छारुन ॥  
गिरजा चवान जामन प्यठ जाम ।  
जपो राम, जपो राम, राम राम राम ॥

(15)

पोश छुख पो' श मो बन ।  
गॉरस सीर मो वन ॥

क्वसंगुं निश रोज़, लोब ।  
मत्तुं तुलत्तुं ग्वबि खोत्तुं, गोब ॥  
लूकु न्यायन, मो सन ।  
गॉरस सीर मो वन ॥

लोचराव बोरा, येंतीय ।  
यमराज छारिय, ततीय ॥  
प्रारनावुन चुँ, दीवगन !  
गॉरस सीर मो वन ॥

त्रेशणा त्राव, स्वर दय ।  
हरदस क्युत, छार वय ॥  
कुल्यन प्यठ, छनान छुय पन ।  
गॉरस सीर मो वन ॥

क्रूधुँच कांगुँर, मुँ तफ ।  
तगियय दयि, नाव ज़फ ॥  
राम—राम, वॉलिंजि खन ।  
गॉरस सीर मो, वन ॥

सर्पे प्रकरथ, चुँय त्राव ।  
अमृत दामा चुँ, चाव ॥  
दिल फुटमुत छु, दर्पण ।  
गॉरस सीर, मो वन ॥

साध संतय, छारुख ।  
फँट्यमित्य बो' ठ खारुख ॥  
साजस थावता, चुँ कन ।  
गॉरस सीर मो वन ॥

ग्वर पृथवी तुँ आकाश ।  
ग्वर सीरिय तय, प्रकाश ॥  
भय कासान, ज़ीवन ।  
गॉरस सीर मो वन ॥

वासनायि, कूत, गोलुख ।  
कामनायि वति डोलुख ॥  
क्वकर्मी ! खव मो चुँ खन ।  
गॉरस सीर, मो वन ॥

अन्दर न्यबर, रोज हिवुय ।  
वावन सोरुय, डुवुय ॥  
ग्वर सुंद, पालुन प्रण ॥  
गॉरस सीर मो वन ॥



गिरजा बोज़ान, साज़ ।  
कॉन्सि नो वनान, छय राज ॥  
ग्वॅर दीवस बुँ अर्पन ।  
गॉरस सीर मो वन ॥

पोश छुख पो 'श मो बन ।  
गॉरस सीर मो वन !!

(16)

प्रभात आव मुचर दारि, बरन्यन, तौर्य ।  
माता नखुँ वाल, पापुँन्य बौर्य ॥

घ्याना कौरिथ कर, माजि कुन प्रणाम ।  
पानय प्रावख जीवुँ मूक्षधाम ॥  
दाम—दाम घुतनय चोवनख नौर्य ।  
माता नखुँ वाल पापुँन्य बौर्य ॥

जसुदा भाग्यवान, वुछुन भगवान ।  
मनुँ किन्य दयस कुन, पोरुन शुकरान ॥  
वुछान छय कृष्णस, तुलान छे' नुँ टौर्य ।  
माता नखुँ वाल, पापुँन्य बौर्य ॥

जसुदा गूर्यवानन छि, दोरन ।  
कृष्णस सनि मा कँन्य, खोरन !!  
पतुँ—पतुँ फेरान, माँज वनहौर ।  
माता नखुँ वाल, पापुँन्य बौर्य ॥

गुर्य बालकन ह्याथ, करान दूँ चूर !  
गूपियन निवान, वस्त्र तुँ बे' यि दूर ॥  
छँकरावान, खौरन हुँज खौर ।  
माता नखुँ वाल, पापुँन्य बौर्य ॥

पूतना तूँ राख्यस, कूँत्य मॉरिथ ।  
पाँपी तूँ शायँलद, कूँत्य तॉरिथ ॥  
बकासुर मारनस, दिचुँथ ना तॉर ।  
माता नखुँ वाल, पापुँन्य बाँर्य ॥

समय सपदिथ, करान छुय सखरा ।  
जसुदायि रावान, टोठ पो' तरा ॥  
राधायि बासान, म्वरली चवर्पाय ।  
माता नखुँ वाल, पापुँन्य बाँर्य ॥

दिवकी जेलस मंज, छि क्केशन !  
वसुदेव वनन कृष्ण कर, बुँ डेशन ॥  
काँली नागस, करान छुय सवार्य ।  
माता नखुँ वाल, पापुँन्य बाँर्य ॥

गूकल त्राँविथ द्राव मथुरा ।  
जसुदायि कुन दिचुँन पतिम नज़रा ॥  
दोनवय पतुँ लारन छि, ननुँवार्य ।  
माता नखुँ वाल, पापुँन्य बाँर्य ॥

(17)

संसार भ्रम तूँ, बाँज्यगार ।  
सँदरस कोना दिख, तार ।

जलँर्यो वूनुथ, जाल ।  
सोम्बरुथ, कोताह माल ॥  
आखरस, ज़ोनुथ च़े सार ।  
सँदरस कोना दिख, तार ॥

मूडुँ ! च़ेर नो च़े, गोय ।  
अथुँ मंजुँ त्रावतो, स्वय ॥  
पंपोशि लोवा, खार ।  
सँदरस कोना दिख, तार ॥

धर्मच वथ छय, ज़ीठ ॥  
तला नेर त्राव, जीवुँ पीठ ॥  
पीठ त्राव, छारुन चुँ यार ।  
सँदरस कोना दिख, तार ॥

संसार कोताह, क्रूठ ।  
भ्रमुँ किन्य बासान, म्यूठ ॥  
ज़ीवस करान छुय, खार ।  
सँदरस कोना दिख तार ॥

सादअ भूज़न चुँय ख्याव ।  
रादअ वगुवा चुँय, त्राव ॥  
सतसंगुँकुय थव, चार ।  
सँदरस कोना दिख, तार ॥

सतसंगी छि चॉन्य, यार ।  
सतसंग छुय दिवान, तार ॥  
यमराज़ करान, छुन लार ।  
सँदरस कोना दिख, तार ॥

ओंम छारुन, छारिय ।  
मारिथ तिनो, मारिय ॥  
मनस मतुँ ह्यतुँ चय बार ।  
सँदरस कोना दिख, तार ॥

राम रठ या,रहमान ।  
त्रावुन छुय, अभिमान ॥  
सूहम शब्द बोज़ि, यार ।  
सँदरस कोना दिख, तार ॥

मल मनुक येम्य हा, पोज ।  
तस द्राव अँन्दरी, सोज ॥  
सोज़ बूज़िथ लबख, सार ।  
सँदरस कोना दिख तार ॥

गिरजा गॅरीब, मजबूर ।  
काया बनान छय सूर ॥  
राजुँ आँसिन, सु या खार ॥  
सँदरस कोना दिख, तार ॥

(18)

सत ग्वर टोठ, साधा ।  
साधन हुंद छु, साधा ॥

रासुँ मंडोला म्य, होवनम ।  
राधायि सीर, बोवनम ॥  
कृष्णन कोरुम वादा ।  
सत ग्वर, टोठ साधा ॥

कृष्णस मंज वुछुम, राम ।  
वनसा कृष्ण किनुँ, राम ॥  
छलुँ गर्य अँन्य मे बाधा ।  
सत ग्वर, टोठ साधा ॥

गंगायि पूजा, करान ।  
वीद मन्त्र छिय, परान ॥  
अनुँ कति त्युथ बुँ, मादा ।  
सत ग्वर टोठ, साधा ॥

ओँननम, अँन्यसुँय, गाश ।  
ओसुम नुँ कांह मे बाश ॥  
कँरनस, इसतादा ।  
सत ग्वर, टोठ, साधा ॥

साधन कोरनम, साल ।  
वोननम दिलकुय, हाल ॥  
बास्योम, प्रहलादा ।  
सत ग्वर, टोठ, साधा ॥

बासान त्रिपोर—सुंदरी ।  
वातान अंदर—अँन्दरी ॥  
माँगमस, आशीरवादा ।  
सत ग्वर, टोठ साधा ॥

साधुँ दर्शुन, दूरलभ ।  
लागान, माँज तय बब ॥  
काँन्सि कम, काँन्सि ज़्यादा ।  
सत ग्वर, टोठ, साधा ॥

ज्ञानुक छुख, भंडार ।  
साज़स छुख बनान, तार ॥  
जिंदुँ थाव, र्मयादा ।  
सत ग्वर टोठ, साधा ॥

गिरजा अँन्य, अनज़ान !  
ज़ानुँ क्या मान, अपमान ।  
भाग्यवानि, गोविंदा ।  
सत ग्वर टोठ, साधा ॥



(19)

यि छु संसार, ना-पायदार।  
कांह नाय काँन्सि हुंद, यार॥

यार्व च़ानिम, थरय।  
ज़िंदुँ रोज़ुँ या, मरय॥  
मैरिथ ति छ़ारय दयि, दर्रबार।  
कांह नाय काँन्सि हुंद, यार॥

साँरी कॅरिम, सरय।  
ह्यथ क्या अपोर, तरय॥  
नावितारस छमनुँ, हार।  
कांह नाय काँन्सि हुंद, यार॥

पान में वोल, रादन !  
लोनचन लोमुम, साधन !!  
साध छुय वीदुक, सार !  
कांह नाय काँन्सि हुंद, यार॥

दुखवुँय को' रहम, सूर !  
दुखवुँय होवहम, नूर !!  
नूरुँ मंज़ लो' बुम, दीदार !  
कांह नाय काँन्सि हुंद, यार !!

काँत्याह यिवान तय, गछान ।  
काँत्याह रिवान तय, वदान ॥  
माँज अंबा दिवान तार ॥  
कांह नाय काँन्सि हुंद यार ॥

माला फिरुँन्य, नुँ सखती !  
बँखत्यन दिवान, मुक्ती !!  
बूतन किच छि, तलवार !  
कांह नाय काँन्सि हुंद यार ॥

श्रूच-श्रूच, अन ख्यावतम !  
शो'द-शो,द, बोलुँनावतम !!  
हावतम, ग्वँरु सुंद दार !  
कांह नाय काँन्सि हुंद, यार !!

भक्तिस मन थव, डंजे !  
द्रायस काँचा, लँजे !!  
छुनुँ ह्यकन लंजन हुंद, बार !  
कांह नाय काँन्सि हुंद, यार !!

मन छलनुक दिम, ज्ञान !  
सादन सूँत्य थवुम, ज्ञान ॥  
खारनय, व्यँनु, अंबार !  
कांह नाय काँन्सि हुंद, यारं !!

ग्वरुँ शब्दुक, थव मे' बोश ।  
तथ प्यठ, दरनुक होश ॥  
पाँपियन हुँज्ज, बुँ सरदार ।  
कांह नाय काँन्यि हुंद, यार ॥

निधर्न बुँ, छुम नुँ कांह यार ।  
छेन्थ अर्थु, कँरु क्या कार ॥  
गिरजायि माँन्यमुँच हार ।  
कांह नाम काँन्सि हुंद, यार ॥

(20)

प्रजलख सिरिं ह्य, मन डंजि थाव ।  
दय छुय डखि तय, स्वर तसुंद नाव ॥

गोब बोर नखि छुय, हेवान छुख गम ।  
नाव चॉन्य पकि, वॉरु-वॉरु, दमुँ-दमुँ ॥  
सूहम शब्दुक, नूर प्रजनाव ।  
दय छुय डखि तय, स्वर तसुंद नाव ॥

लूभुक तुँ वासनायि, हुंद मुँ थव खम ।  
दूखुँ स्वखुँ विजि, रोजुन छुय सम ॥  
ग्वरुँ शब्दुक दम, मनस सँनिराव ।  
दय छुय डखि तय स्वर तसुंद, नाव ॥

शरीरच प्रय मुँ थव, छुय मेंचिबोन ।  
रुहस मतलब, सनि खेतुँ सोन ॥  
वासना त्राव, त्राव चंचल स्वभाव ।  
दय छुय डखि तय, स्वर तसुंद, नाव ॥

शुर्य बाच सॉरी, हुसनि-गमखार ।  
भ्रम छुय संसार, छारुन यार ॥  
वारुँ-वारुँ वननय, कुस कॅमिस जाव ।  
दय छुय डखि तय, स्वर तसुंद नाव ॥

मन थव साफ तय, तन थव साफ ।  
दुयतुँ भाव करि कांह, करतस माफ ॥  
मसाँ दिस सेर, बस दिस अख पाव ।  
दय छुय डखि तय स्वर तसुंद नाव ॥

करान छुख पाठ तय, पूजा चॅय ।  
दय छुय राँज्य, त्राँविथ मनि दुँय !!  
आँरीकश बन, लॅकुर चीरुँनाव !  
दय छुम डखि तय, स्वर तसुंद नाव !!

पनन्यन तुँ परदेन, हुंद नुँ कांह गम ।  
मुशिकल छु जीवस, कडुन दम-दम ॥  
दय वनान, जीवुँ ममता, पनुँन्य त्राव ।  
दय छुम डखि तय, स्वर तसुंद नाव ॥

करि युस माजि सीवा, परिपूर ।  
दाता दिवान तस, पोतरस, नूर ॥  
तुलमुलि बडि बॅड दक्षिना, त्राव ।  
दय छुम डखि, तय स्वर तसुंद, नाव ॥

गिरजायि त्रावतम स्यँज नज़रा ।  
आहम सावुम छुम सु बजरा ॥  
मूडस में गंगुँजल, दामा चाव ।  
दय छुय डखि तय, स्वर तसुंद नाव ॥

(21)

ग्वेरु चाव मँसती हुंद मे दामो ।  
जामन प्यठ चावतम, जामो ॥

सरफुँ मति मसतानुँ, छुख मे, सूत्य-सूत्य ।  
रिशतुँ चे सूत्य क्याह? छिम वनान कूत्य ॥  
काँतिल कायायि दिन म्य पामो ।  
जामन प्यठ चावतम जामो ॥

जामन सूत्य छुख, जाम टकरावान ।  
स्सारुक भ्रम तुँ यम चुँ मँशरावान ॥  
चँवत्स तुँ सूज्यथम, पयगामो ।  
जामन प्यठ चावतम, जामो ॥

जाम च्यथ वोलुँ दोलुँ छुख बोलुँनावान ।  
शिव लूकुक दार छुख खोलुँनावान ॥  
नँलुमति रटुँहथ, लोल आमो ।  
जामन प्यठ चावतम, जामो ॥

चथ वुछुम, चवपार्य चोनुय, रुपिरुप ।  
ब्रह्मा, वैष्ण, महेश, छिय, दयि स्वरुप ॥  
दिमुँ क्या म्यवुँ छुम, खॉम्य खामो ।  
जामन प्यठ चावतमँ जामो ॥

फिरान क्याज़ि छुख, जामन प्यठ जाम !  
बंगुँ मति मँच कँरथस बुँ बदनाम !!  
चवान छस, ह्यडान छुँम, गॉम्य गामो !  
जामन प्यठ चावतम, जामो ॥

जामँ—जामँ चोम, रुदुम नुँ कांह होश ॥  
मशँरोवथम मालि, बोश तय जोश ॥  
गोश थव बोलुँ नाव, राम—रामो ।  
जामन प्यठ चावतम, जामो ॥

मरीजस मय छुय, दवा तय शफा ।  
म्वरदस कफन छुय, रफा तय दफा ॥  
सन्तूर बोज़, गाल, क्रूध कामो ।  
जामन प्यठ चावतम, जामो ॥

मयखानस मंज़, लालुँ छुय साल ।  
रोनक तुँ दम छुख, वँदहय लाल ॥  
दीद दिल छस, छुख मरहामो ।  
जामन प्यठ चावतम, जामो ॥

गम छुम, त्रेशि हँच छस, बेहोश ।  
फे रि—फे रि चमँहा, दिम मे पंपोश ॥  
तनहा रिवान, सुबुहँत शामो ।  
जामन प्यठ चावतम, जामो ॥

जाम छुख चावान, रोज़ान बू मस !  
वाँरागँ नार छुम, गँहनुँ तय वस !!  
साकी छुख, छसय पशेमानो !  
जामन प्यठ चावतम, जामो !!

सो रुम पज़ि मनुँ, राथ दोह, दय तुँ पान ।  
सरह कोरमे पानय, मय तुँ मयखान ।।  
छोन्य क्याज़ि चावान, बे-ईमानो ।  
जामन प्यठ चावतम, जामो ।।

जाम म्वकलिथ, छम यिवान जुदायी ।  
करँ किथुँ लालुँ सुँन्ज, हक-आदायी ।।  
गिरि क्या यियि. बागिअंजामो ।  
जामन प्यठ चावतम जामो ।।



(22)

ग्वरुँ रो टमय चोन, दामानो ।  
लोगुथ बेगॉनु, गॉरज़ानो ॥

ज्ञानुँ प्रकाश छार, मन थव शांत ।  
अंधकार डॅलिथ गव, यिवान छुय प्रभात ॥  
दॅदिमित्यन, डोर्यन, चुँ सगँवानो ।  
ग्वरुँ रोटमय चोन दामानो ॥

धर्म संकटसुँय, छस, फसेमुँच ।  
भ्रमची, नारुँ कोदुँ, छम ततेमुँच ॥  
अँगनस, श्रेहं ताव, जानानो ।  
ग्वरुँ रोटमय चोन, दामानो ॥

जुदॉयी जिगरस, करान पारुँ पार ।  
ग्वरदीवुँ भवसँरु चुँ, तारन हार ॥  
वसि हुद, मस भक्त, चावानो ।  
ग्वरुँ रोटमय चोन, दामानो ॥

जॅरिस समावारस, बनि कति चाय ।  
ज़र तुँ वर कासान, ग्वरुँ सुँन्ज माय ॥  
दाय ह्यथ, चाय च्यथ, शमशानो ॥  
ग्वरुँ रोटमय चोन, दामानो ॥

शुर्य तुँ बाँच हेछिनावान, छिम असूल ।  
स्वन छुनँ, सरतल, अँनु क्या, वसूल ॥  
साजुक चुँ सोदा, साहिबानो ।  
ग्वँरु रोटमय चोन, दामानो ॥

मनुँचे लरि, दारिबर यलुँ त्राव्यम ।  
स्वरगुँचि हूरुँ, तति, सोम्बराव्यम ॥  
जोलुय शमँहन, परवानो ।  
ग्वँरु रोटमय चोन, दामानो ॥

गरि छुय ग्वर छारुन, च़ठ म पाद ।  
गरिकुय ज़्युठ छु बडि खोतुँ बोड साद ॥  
धरि वुजि नागराद मसतानो ।  
ग्वँरु रोटमय चोन, दामानो ॥

निधर्न गिरजा, दिमुँ क्या दान ।  
अनपड तुँ मूर्ख, छस बुँ अनजान ॥  
तोलहा, अँनु कति, परमानो ।  
ग्वँरु राटमय चोन, दामानो ॥

(23)

रामायण राम—राम, बोलुँनावन ।  
राम, राम, रामुँ नाव, शोलुँनावान ॥

राम सीवक, हनुमान बलवान ।  
लक्षमणस चोनुन, म्वरदस ज़ान ॥  
भक्त ओस, ईशरस ओश वथुँरावान ।  
राम् राम् रामुँ नाव, शोलुँनावान ॥

सुग्रीवुँनय बँखती, प्रावनावतम ।  
बॉली छस, कपट मँशरावतम ॥  
मूड्स पननीय मे पाप तोलुँनावान ।  
राम् राम् रामुँ नाव शोलनावान ॥

लंका दज़ान छय, पारुँ पतुँ पोस्य ।  
करि क्या पनुन, करि क्या वोरय ॥  
दयि अनुग्रह छुय, छुम बोलुँनावन ।  
राम, राम, रामुँ नाव शोलुँनावान ॥

राम, नावस, काँचाह छि बरकथ ।  
रोज़ि कति ज़ीवस, असुर प्रकरथ ॥  
विभीषण रामस छु, वुजुँनावान ।  
राम राम रामु नाव शोलुँनावान ॥

से'दि सादुँ, काँचाह छय चे', नर्मी ।  
माजि कैकी छुख, वनान घर्मी ।।  
साध छुख साधेँ दर्शुन मे, करनावान ।  
राम, राम, राम, नाव शोलैनावान ।।

बैखतिस टोठान छुख, बसंत कावस ।  
जागान ख्यनुँ-ख्यनुँ, छु-सु-दयिनावस ।  
बक्तनं तुँ बालेकन, छुख ललुँनावान ।  
राम, राम, रामुँ नाव शोलुनावान ।

ड्वाह करोर नाव कति, ह्यकुँ, सो'र्यथुँय ।  
दय सीवायि कति ह्यकुँ, दैरिथुँय ।।  
वालंजि राम-राम, छस खनुँनावान ।  
रामेँ रामेँ रामुँ नाव शोलुनावान ।।

गिरजा छारान बस, यिहोय अनुग्रे'ह ।  
दिम वाँराग, नेर्यम कुनी रे'ह ।।  
पानय पालान, छुख चुँ पालुनावान ।  
राम, राम, रामुँ नाव शोलुँनावान ।।

(24)

पूजा करतो या पर, न्यमाज ।  
तनुं गोख होंरिथ, वन्य जेन बाज ॥

पूजा छि त्रावुन भ्रम तुं अभिमान ।  
त्रावुन भय, प्रावुन छु वरदान ॥  
साधन साँदिल, सिंगार तय साज ।  
पूजा करतो, या पर न्यमाज ॥

मनुं वारि, संतोष ब्योला वव ।  
लावि-लावि लूनिथ, बरतो खब ॥  
मन, मँशीद, मंदर, अँन्दरी पाज ।  
पूजा करती, या पर न्यमाज ॥

अध्याय तुं सिपारु प्रभातस परान ।  
जगतुक जगत नेमाज व्वपवास दरान ॥  
राम तय रहमान छुय कुनुय राज ।  
पूजा करतो या पर न्यमाज ॥

इद्रे शुमरिथ, छार अनुग्रे'ह ।  
पायस प्यथ त्राव, वे'ह तय ते'ह ॥  
मे'चि सँतुय मीलिथ, छुनँ कांह नाज ।  
पूजा करतो, या पर न्यमाज ॥

यावुन सपधिय, सोर तसुंद नाव ।  
अल्लाह कृष्ण पर, ममता साव ॥  
कन थव बोज म्वरली आवाज ।  
पूजा करतो या पर, न्यमाज ॥

होट चीर वासनायन, त्राव दोर ।  
लूभुँचि लरि, कयाजि चानान खोर ॥  
पीरन फँकीरन, वुछ चुँ अंदाज ।  
पूजा करतो, या पर न्यमाज ॥

ग्वँरु सीवा छय, प्रावुन सवाब ।  
गिर, धर्मराजस दिय क्या जवाब ॥  
खोरि रुस नाव छम, बनावुन जहाज ।  
पूजा करतो, या पर न्यमाज ॥

(25)

कुकिले वोन् न्म कृष्णुं वनवुनये ।  
बास्योम ग्वरुं सुंद, वीद परुनये ॥

न्यजबॉन्य प्रभातस, वुजॅनावान ।  
रुम—रुम शरीर छुम, हिलुँनावान ॥  
कू, कू, कू, कू छुम, बोलुँवुँन्यये ।  
कुकिले वोननम कृष्णुं वनवुनये ॥

जून तय तारख, मालुँ छिय बनावान ।  
बुलबुल, लोलुँ महारेन्य छि सखरावान ॥  
सनम्बरव दर्शुन छुय बनवुनये ।  
कुकिले वो'ननम कृष्णुं वनवुनये ॥

बागन वार्यन वुछुम, अम्रे'त जल ।  
शारिका छि फेरान व्यनुँ कुलिनुँय तल ॥  
वोननम साज बोज, छुय नुँ सनुँनये ।  
कुकिले वो'ननम कृष्णुं वनवुनये ॥

साध सन्त साँरी, वोथान छि प्रभातस ।  
माजि ज़ारी करान, वँथित अर्धरातस ॥  
सिरियन प्रकाश होव, प्रभात डलँवुनये ।  
कुकिले वोननम, कृष्णुं वनवुनये ॥

सरखम तुँ अर्पन, छस अथ प्रभातस ।  
दीवी तुँ दिवता, जागन छि सातस ॥  
दर्शुन तुँ दीदार, छुय जलँवुनये ।  
कुकिले वोननम, कृष्णु वनवुनये ॥

नरकी तुँ पापी शवंगान छि प्रभातस ।  
यमदूत यमलूकुँ, लेखन छि खातस ॥  
सुलि व्वथ जीवुँ, रोजख च शोलवुनये ।  
कुकिले वोननम, कृष्णु वनवुनये ॥

ब्रमा, वेषिण, महेश, पूजन प्रभातस ।  
गौरी गणेष लेखन, छि ललाटस ॥  
रामुँ जुव, रामँ दरबार, खोलुँवुनये ।  
कुकिले वोननम, कृष्णु वनवुनये ॥

प्रभातस श्रुचि श्रानि, आसन दारुन ।  
सरस्वती तुँ सेतार, लागुन चे छारुन ॥  
नूरि नूरानस, लाग जागुनये ।  
कुकिले वोननम, कृष्णु, वनवुनये ॥



संगरमाल छय, भूत प्रीत गालन ।  
खयनि—खयनि ललँवान, भक्तन तुँ लालन ॥  
शवंगि युस प्रभातस छु नुँ ब्रह्ममुनये ।  
कुकिले वोननम कृष्णु वनवुनये ॥

दारि बर मुचँराव, माता छि प्रारान ।  
साधन तुँ संतन, लोलुँमँच छि छारान ॥  
बर बंद कँरिथ, कति प्रावि दर्शुनये ।  
कुकिले वोननम, कृष्णु वनँवुनये ॥

कुनी तय मुनी, रावरावन छि रँचुँय ।  
जानन नुँ बंद बांदव, शुर्य तुँ बाँचँय ॥  
गिरि साँरी हिवी, परुद तुँ पनुनँये ।  
कुकिले वोननम कृष्णु, वनँवुनये ॥

(26)

लालुँ जाव, ल्वलि मंज ललुँनोवुमं  
अँतलास वोलँमस तुँ ,प्रजँनोवुमं

यान्य जाव, तान्य बास्योम भगँवानं  
नंद बब छुम वनान, छख नादानं  
लोँचि तल थाविथ, दामँ-दॉम-चोवुमं  
लालँ जाव, ल्वलि मंज, ललुनोवुमं

शामँ रंग, शाम लॉल, श्याम छुय नाव  
मंजलिस जुँचुँ पेय, ज़न तुलुन वावं  
मनुकुय सीर, मनि हा में बोवुम।  
लालुँ जाव ल्वलि मंज, ललुनोवुम।।

वनया राम किनुँ, वनय बलराम।  
जफ तफ कॅर्य, तँय आम अंजाम।।  
अथस थफ करिथ, पकुन हेछँनोवुम।  
लालुँ जाव, ल्वलि मंज, ललुँनोवुम।।

रुपन प्यठ छुम, रुप दारान।  
दय छुम, ख्वनि मंज, छस हॉरान।।  
ग्यूर आम, शुर्य सुँन्ध पॉठ्य पोवुम।  
लालुँ जाव, ल्वलि मंज, ललुँनोवुम।।

नॅट्य फुटरावान, करान थनि चूर।  
नूरि नूरानस, करस गूरू गूर॥  
लूकुँ हुंद ह्यडुन हय, व्यतरोवुम।  
लालुँ ज़ाव, ल्वलि मंज, ललुँनौवुम॥

कंजस गो'न्दुम तय, मंजि, त्रौवुम फ्रख।  
दूरि दोलुँ वुछँमस, कॅरँमस खृख॥  
राजुँ रेश, वुछिथ माजि, पछँतौवुम॥  
लालु ज़ाव, ल्वलि मंज, ललुँनौवुम॥

गुर्यबायि, फॅरियाद करान माजे।  
घर घर फेरान, कृष्णुँ राजे॥  
लोरि लायुन कॅरिथ, व्यसरोवुम।  
लालँ ज़ान ल्वलि मंज, ललँनौवुम॥

गंडुन ह्योतुम गुदअमिस, गोम छोट ज्यूठ  
आरहकुत छुम वुछान, कोरँमस म्यूठ  
रत्य रत्य, सन्सकार, ह्यछँनौवुम  
लाल ज़ाव ल्वलि मंज, लँलुनौवुम

कालीनाग वोथ, वुछुन नुँ पथ ब्रोंठ ।  
अथव सूँत्य रोटुन नाग, मूरनस चोंठ ॥  
व्वपकार कोरुन, दूख मे गुज़रोवुम ।  
लालुँ ज़ाव, ल्वलि मंज़, ललुँनोवुम ॥

वस्त्र नियनख, ओननख ग्यूर ।  
लीलायि थफ कँरिथ, ओन कृष्णुँ चूर ॥  
गूपाल, स्वामी में बास्योवुम ।  
लालुँ ज़ाव ल्वलि मंज़, ललुँनोवुम ॥

नंद गूरिस ओस, असँलुक ज्ञाण ।  
माजि आँस ममता, आँस अनज़ान ॥  
बूजिथ दज़ुन—दान, छयवरोवुम ।  
लालुँ ज़ाव, ल्वलि मंज़, ललुँनोवुम ॥

लालुँ द्राव, ज़न द्राव राज़, सॉरस ।  
पतु—पतु लारान, ज़न गॉरस ॥  
क्वछि क्वछि ललुँवुन मशँरोवुम ।  
लालुँ ज़ाव ल्वलि मंज़, ललुँनोवुम ॥

जसुदायि बासेयि, स्वपनेँ माया ।  
बेमार बेजान, छम यि काय्य ॥  
कृष्ण् कृष्ण कायायि, खनुँनोवुम ।  
लालुँ जाव ल्वलि मंज, ललुँनोवुम ॥

रथस प्यठ गिरिजाई, गिरधर द्राव ।  
दिवकी तुँ वसुदीवस, छुय चाव ॥  
नंद बब वनन, दयस पुशरोवुम ।  
लालुँ जाव ल्वलि मंज, ललुँनोवुम ॥

(27)

रथि खार प्रभात वेसिये ।  
हेरि-हेरि, माँज खसिये ॥

स्वंदर-मालँ, फोजमुँच ।  
जालन छस, बुँ वँजमुँच ॥  
लालन, वँन्य दि वेसिये ।  
हेरि-हेरि माँज खसिये ॥

फेरान छय, मंगुस वर ।  
होश थव, मुचराव बर ॥  
सरुँ कर पान, वेसिये ।  
हेरि-हेरि मोजँ, खसिये ॥

हारि चरि छय, बोलान ।  
पाप शाफ छय, तोलान ॥  
जोलानुँ क्रूठ, वेसिये ।  
हेरि-हेरि, माज, खसिये ॥

कुकिलि हुंद हूँ हूँ बोज ।  
अथ खार, अँन्दरी सोज ॥  
रोज बेदार, वेसिये ।  
हेरि-हेरि माज, खसिये ॥

प्रार मय, सिरिं खसनस ।  
जाय छार, तति बसनस ॥  
असनस नुँ वार वेंसिये ।  
हेरि-हेरि माज, खसिये ॥

श्राना घ्याना । कर !  
लगिय यिनुँ मनुँसुँय, वर ॥  
ग्वर छु, सरकार वेसिये ।  
हेरि-हेरि, माँज खसिये ॥

आसन छुय च़े, दारुन ।  
अख दम छुनुँ, प्रारुन ॥  
खम त्रावुन छु, वेसिये ।  
हेरि-हेरि, माँज खसिये ॥

जप, ग्वँरु सुँन्ज, माला ।  
लबखअनमोल, लाला ॥  
बनख न्यरमल च वेसिये ।  
हेरि-हेरि, माँज खसिये ॥

कुल्य,कँट्य, साँरी जुकान ।  
वुछिथ माता, छे रुकान ॥  
शमा शाबान वेंसिये ।  
हेरि-हेरि माँज खसिये ॥

प्रभातस कुछम, नोनूय नूर ।  
चूर हेकि त्रैविथ चूर ॥  
दरुदा पर चूँ, वसिये ।  
हेरि-हेरि माँज खसिये ॥

समय चलवुन प्रभातस ।  
नाव खारुन चे खातस ॥  
जातस हिसाब वेसिये ।  
हेरि-हेरि माँज खसिये ॥

शबनम लेखान सूहस ।  
रोजुन सोम तय सम ॥  
कर चूँ दीदार, वेसिये ।  
हेरि-हेरि माँज खसिये ॥

आलुछ त्राव, बन चूँ सुँह ।  
मन मंदरस, दि मुँ खुँह ॥  
दुँह छु, संसार वेसिये ।  
हेरि-हेरि माँज, खसिये ॥

सत ग्वर छु वुजनावान ।  
रामुँ रामुँ, परँनावान ॥  
गिर छि, बे होश वेसिये ।  
हेरि-हेरि मोज खसिये ॥



(28)

गण्पतँ वंदुँहय, तन मन तुँ प्राण ।  
बब तुँ मौज शूबिदार छुख वरदान ॥

वक्र तुँडँ नागँ यज्ञण, छुख आँरी ।  
गुल्य गँन्डिथ, आरुँ कँत्य, न्यमान साँरी ॥  
जाँरी करान, पुशँरावान पान ।  
गणपत वंदुँहय, तन मन तुँ प्राण ॥

यज्ञव जपन विजि, छुख च म्वखतँहार ।  
कारन तुँ व्यवहारन, दिवान तार ॥  
हार माननोवथन, शिव बलवान ।  
गणपत वंदुँहय, तन मन तुँ प्राण ॥

प्रावँन्य आँसुँय, सर्व-शखती ।  
माजि हुँन्ज, आँसुँय पँज बखती ॥  
योखती छि, बबुँ राजस, खँच हान ।  
गणपत वंदुँहय, तन मन तुँ, प्राण ॥

दरबान बँनिथ, होवुथ दम तुँ जोश ।  
वनि क्या नीलकँठ, रुदुस नुँ होश ॥  
तोश गज म्वखुँ, माँनिथ नुँ, चे आन ।  
गणपत वंदुँहय, तन मन तुँ प्राण ॥

माँज पार्वती, ओश त्रावान ।  
दिलकुय दोद, शीवस बावान ॥  
संतान ओसुय, न जि गॉरजान ।  
गणपत वंदुँहय, तन मन तुँ प्राण ॥

हयतोनय वरदान, सपँदेयि शांत ।  
भूत प्रीत, कासवुन छु, हाँथी दांत ॥  
ब्वछिहोत, करान छुय, द्रमनुक पान ।  
गणपत वंदुँहय, तन मन तुँ प्राण ॥

सारिनुँय ब्रॉठ, छय चे, अनवॉरी ।  
माँसूमँ ! छुख ह्यवान लूकुँ खॉरी ॥  
बोय चोन, कुमार जी, छुय क़ेशान ।  
गणपत वंदुँहय, तन मन तुँ, प्राण ॥

छुख पानुँ, ज्ञानुक अमृत—दार ।  
लंबोदर छुख, छुय नमस्कार ॥  
राम छुय स्वरान, रावुन छु सपँदान ।  
गणपत वंदुँहय, तन मन तुँ, प्राण ॥

सेदिदाता छुख, भयनाशनी ।  
शत्रुनाशनी, छुख रुगँनाशनी ॥  
गण, ग्वर, शब्दा स्वरनावान ।  
गणपत वंदुँहय तन मन तुँ, प्राण ॥

ग्वनवान छुख, चुँय, बखशनहार ।  
असि पापियन, यिथुँ तिथुँ, दितुँ तार ॥  
नार तय मार छुख, अँन्जरावान ।  
गणपत वंदुँहय, तन मन तुँ, प्राण ॥

आसन चोन, ड्युँतुम थजरस ।  
लवकचार पानुँ, चाख, ज़िठ वर्गस ॥  
बॅर्गस बॅर्गस, ज़ज़ुर कासान ।  
गणपतँ वंदुँहय, तन मन तुँ, प्राण ॥

सरस्वती, लक्ष्मी, लरि आसान ।  
सिरिँ चन्द्रमुँ, दोनवय बासान ॥  
कासान दुख दाँघ, प्रज़लावान ।  
गणपत वंदुँहय, तन मन तुँ, प्राण ॥

सन्तन साधन, नावा वुज़ान ।  
ग्वडुँ गणेश पतुँ शिव छिय पूज़ान ॥  
तोति शिव वनान छुय छुहम दुरँदान ।  
गणपत वंदुँहय, तन मन तुँ, प्राण ॥

साघव दियतव में आर्शवादा ॥  
लोलमच गिरजा लायान नादा ।  
राधा क्रष्ण कुनुय ब्र गजँरावान  
गणपत वंदुँहय तन मन तु प्राण ॥

(29)

ग्वरु शब्दा छुम ज़बर ॥  
बे होश, छम नो, खबर ॥

छुम नुँ रंग, छम नुँ कांह शूब ।  
गम क्या, छुख चें महबूब ॥  
मजनून, लॉलि, छुय, नंबर ।  
ग्वरु शब्दा छुम ज़बर ॥

हृदय कुठि, बिसतर मे त्रोव ।  
शक्ति, गणेश, शिव मे सोव ॥  
न्यँन्दरा कँरुख, ह्यथ टबर ।  
ग्वरु शब्दा, छुम ज़बर ॥

कुठा म्यूलुय, चे शूबिदार ।  
चूरि पाठय करान दरबार ॥  
शखती छुख चें, रहबर ।  
ग्वरुँ शब्दा छुम, ज़बर ॥

आलथ त्रँवमय, प्राण ।  
पेश शुर्य, बाँच तय जान ॥  
भजन मे बूज़न तय, बखर ।  
ग्वरुँ शब्दा छुम ज़बर ॥

न्येन्दरि मोथा, छिय मंगान ।  
दीशि त्याग, किन्य, छिय वदान ॥  
कुनुय शमशान, तय कबर ।  
ग्वरुँ शबदा, छुम ज़बर ॥

त्रेपरिथ दारि बर, आँस्य ।  
सोम्बरान थाल तय, खँस्य ॥  
दय परखान छुय, सबर ।  
ग्वरुँ शबदा, छुम ज़बर ॥

नोवुय ज़नमा, असि, दोर ।  
जा शुर्य, भागवत छोर ॥  
तबरदारस, मीज, तबर ।  
ग्वरुँ शबदा, छुय, ज़बर ॥

फोलुँरॉविथ, शुर्य तुँ बाँच ।  
रथि खँत्य, द्वह क्यो रॉच ॥  
ललुवान जूनि, अंबर ।  
ग्वरुँ शबदा छुम ज़बर ॥

सन्तन छु तेज़, रफतार ।  
गिर गामुँच, गिरिफतार ॥  
मूडन व्वथान, बंबर ।  
ग्वरुँ शबदा छुय, ज़बर ॥

(30)

मथुरायि वजान, बाजे ।  
दिवकी पकान, राजे ॥

सेतार, संतूर, वजान ।  
जायि-जायि, जूला, दजान ॥  
मुबारक दिवान, माजे ।  
दिवकी पकान, राजे ॥

अग्रसेनन, बूज, शोर ।  
कनसन तस, अर्थुँ दोर ॥  
ओनुथ क्या, मे क्युत हाजे ।  
दिवकी पकान राजे ॥

धन्य छुख, धनुष फुटरुथ ।  
धनुष चूरँ पानुँ सोम्बरुथ ॥  
कनुस, ख्योवथन, याजे ।  
दिवकी पकान, राजे ॥

कोलस होस, मोरथन ।  
भवँसागरस चे, तोरथन ॥  
ब्रह्म गंडान चे, ताजे ।  
दिवकी पकान, राजे ॥

कुरुक्षेत्रस सपुद, मेल ।  
ब्रिज तँ मथुरा गिंदान, खेल ॥  
गूपी छि ला-यलाजे ।  
दिवकी पकान राजे ॥

चोतुरबजरुप, होवुथ, अकरूरस  
अर्मत चोवथन गोमुत छु मस  
मनस चजस, जलरजाजे  
मथुरायि वजान बाजे ।

गूपी कोता छि, ओश त्रावान ।  
गिरजा, वदान, ज़नछि वनुनावान  
छेनँगछख रूय-बाजे  
मथुरायि बजान बाजे ।

(31)

म्वखतुँ द्राव गॉरस नुँ पय ।  
शरिका ! जुँजिथ मनस खय ॥

गॉर गव, ग्वरुँरोस जीव ।  
थजि लरि, डेज छय नीव ॥  
राम—राम छुनुँ, छुय हय ।  
म्वखतुँ द्राव गॉरस नुँ पय ॥

ज्ञाणुँ म्वखतुँ छुय निशकल ।  
वासनायि छुय, चलान, मल ॥  
बरान गछ, म्वचन छुय वय ।  
म्वखतुँ द्राव, गॉरस नुँ, पय ॥

कलियुगुँ ! म्वखतुँ लूनमय ।  
शुप्येन, ल्वंगन्यन में म्यूनमय ॥  
त्रावान, ज्ञाँणी सय ।  
म्वखतुँ द्राव गॉरस नुँ, पय ॥

नवरात्रन छु दीदार ।  
गहनुँ त्राव प्राव म्वखतुँहार ॥  
चमकान, छस नो खय ।  
म्वखतुँ द्राव गॉरस नुँ पय ॥



संतन धुत में म्वखतुँ ब्योल ।  
जा शुर्य सुँन्च, पॉठ्य पोल ।  
दोनवय करान ज़न तय ।  
म्वखतुँ द्राव गॉरस नुँ पय ॥

कृष्णन सजॉव्य, गुर्य बॉज ।  
म्वखतुँ द्राव, बलवान मॉज ॥  
राधा छि बोज़ान नय ।  
म्वखतुँ द्राव, गॉरस नुँ पय ॥

पनन्यन नाय, बोवुम ।  
परधेन, व्यछुनोवुम ॥  
आश्रम जाय, म्यॉनय छय ।  
म्वखतुँ द्राव गॉरस नुँ, पय ॥

नज़रा, शेहजार, सग ।  
ज़खमन चलान, छम, दग ॥  
गिर करान छय चे, जय-जय ।  
म्वखतुँ द्राव गॉरस नुँ पय ॥

श्रूच गय् म्यन मनँ वॉर  
सोमरान नेरनस न तॉर  
माला छुनिथ छु न भय  
म्वखतुँ द्राव गारस नु पय

(32)

बब वनसा, किनुँ यार ।  
सतग्वर म्योन, शूबिदार ॥

ज्ञानुँ अमर्यथ, चावान ।  
दूरे प्रकाश, त्रावान ॥  
बखत्यन तारन-हार ।  
सतग्वर म्योन, शूबिदार ॥

भखत्यन बनावान, शुर्य तय बॉच ।  
रावरावान, मअज दूह तुँ रॉच ॥  
सन्तन करान, इन्तिज़ार ।  
सतग्वर म्योन, शूबिदार ॥

ग्वर दिवान, ताब तहमूल ।  
बखशान, गलती तुँ भूल ॥  
कंड्यन बनावान, गुलज़ार ।  
सतग्वर म्योन शूबिदार ॥

गरु दाँनी, दिवान दान ।  
वछि वॉलिंजि, करान मान ॥  
वुछान छुय आरोपार ।  
सतग्वर म्योन, शूबिदार ॥

राम—राम, चोनुय प्रचार ।  
लागान चुँ, रामुँ दरबार ।  
संसार, नारोनार ।  
सतग्वर म्योन, शूबिदार ॥

भक्त छिय चौर्य तय फँअयर  
सीवायि चानि, छिय लौर्य ॥  
मटि छय, खौरि खार ।  
सतग्वर म्योन शूबिदार ॥

मेतुँ, पानस, कर कुनुय ।  
जंन कृष्ण तुँ अर्जुनुय ॥  
कुनय छुख, अपरमपार ।  
सतग्वर म्योन, शूबिदार ॥

ग्वरुँ ! सीरा बोवमय ।  
शरीर रुम—रुम, होवमय ॥  
सीरुँ बोज छुख चँ सरदार ।  
सतग्वर म्योन, शूबिदार ॥

दासतान वारुँ, बोजान ।  
दयस शेछ खबर, सोजान ॥  
मूडन करन, खबरदार ।  
सतग्वर म्योन, शूबिदार ॥

रामुँ दफतर, शोलुँवुन ।  
रामायण छु, बोलुँवुन ।।  
गिरजा छस, जमादार ।  
सतगवर म्योन, शूबिदार ।।

सातविक चयोन आहार  
पुनिम छख करन नेरआहार  
जमीनस मेच च्य, हमवार  
सतगवंर म्योन शूबिदार

बोमवारि बोम कास छुख मंगल ।  
 ग्वनु—वान हनुमानुँ, छुख चुँ न्यरमल ॥

पौश ऑसिथ, ओसुख वशनव ।  
 रामं बॅखतिस छुनुँ, बूज़न शव ॥  
 मन छुय डंजि, रोज़ान नुँ चंचल ।  
 बोमवारिबोम कास छुख मंगल ॥

वांदर ज़ाथ कति, हेयि वनवास ।  
 राम सीता करन, चे हृदयस निवास ॥  
 शूबान दोनवय, छख चॉन्य कल ।  
 बोमवारि बोम कास छुख मंगल ॥

राम चरनारव्यंद काँत्याह चे टॉट्य ।  
 रामुँ सीवा बासान छय, नुँ हाँट्य ॥  
 रामुँ जल बाँगरान, छुख कमंडल ।  
 बोमवारि बोम कास, छुख मंगल ॥

दमुँ—दमुँ पकान, ज़न छु, साल खांदर ।  
 सोथ दितुथ सागरस, तँर्य वांदर ॥  
 दरबार चींयथख घुतनय बल ।  
 बोमवारि बोम कास, छुस मंगल ॥

पिलुँनावन, वॉज, माजि हूरे ।  
पोत्रु ! मारनय, जल च़रोज़ चूरे ।  
रावनस मारि राम, छुस मनस मल  
बोमवारि, बोम कास, छुख मंगल ॥

लंका जॉलिथ कोरथस जूला ।  
महादीवस हिलोवुथ त्रिशूला ॥  
प्रसादा शक्ति पातुक, चँ शीतल ।  
बोमवारि बोम कास छुख मंगल ॥

रामदूत रहबर छुख सायिबान ।  
गिर छि ब्रहमन, दयि छुख चुँ यज़मान ॥  
बे'ख्या छस मंगान, छस मंगान न्यशकल ।  
बोमवारि बोम कास छुख मंगल ॥

(34)

टाठि कृष्णुं म्याने, स्वनुं कनं दूरो ।  
स्वनि मंजलिस करय, गुरूं गूरो ॥

बालुक छुख, छुख नुं, मर्यघादुम ।  
किशमिश मसतस, कति नूरो सुम ॥  
जटुं कलुं, मंजुं वसान नूरिं नूरो ।  
स्वनि मंजलिस करय, गुरूं गूरो ॥

बखतुं बॅड जसुदा, दयस छि सावान ।  
बेयि छस गलि-गलि, दौध चावान ॥  
जन पुनिम बुछुम, चॅन्दॅर पूरि पूरो ।  
स्वनि मंजलिस करय गुरूं गूरो ॥

त्रपॅरिथ दारि बर रटान कृष्णस ।  
कोलुः छलुगोर, वनान तस वेषनस ॥  
दोखुं-दोख छस करान, मजॅबूरो ।  
स्वनि मंजलिस करय, गुरूं गूरो ॥

नंदुं बब गुल्य गॉन्डिथ, छुस करान प्रणाम ।  
बालुं लीला वुछिथ, दोहस गछान शाम ॥  
फुचॅमचि नावि सानि, छुख चुं खूरो ।  
स्वनि मंजलिस करय गुरूं गूरो ॥

जाह द्वह, चोन म्योन, यारा कुनय ।  
करतूत चोन मोन, ब्यो'न-ब्योनय ॥  
नजदीक ऑसिथ, दूरि दूरो ।  
खानि मंजलिस करय, गुरू गूरो ॥

जर्म सतमा, द्वह चोनुय दरान ।  
भागवत, गीता घरुँ-घरुँ परान ॥  
ज्यो'न मरुन दयि सुंद दोसतूरो ।  
खानि मंजलिस करय गुरू गूरो ॥

बिन्द्राबन छुय ज़ोलन तुँ ज़ोतन ।  
जसुदा वनान हार्यन तुँ तोतन ॥  
गाटुल कृष्णुँ-गा'बुर, छुनुँ चूरो ।  
खानि मंजलिस करय गुरू गूरो ॥

गिरजा गुरूदीवस दास, दाय  
डुवँनावतम मनस, लछ तय हाय  
अडुकज त अडँगर च़े मंजूरो  
खानि मंजलिस करय गुरू गूरो



(35)

कृष्णो, कृष्णो, शामुँ रंग कृष्णो ।  
राधा छस बुँ नालानो, हो,हो, हाय ॥

मथुरा द्राख चुँय, ब्रिजि हूरुँ त्रँविथ ।  
साँविथ, शर चे' मेहमानो हो, हो, हाय ॥

जसुदा दम फँट्य प्रँटु लद गाँमुँच ।  
प्याँमुँच स्व, हॉर असमानो हो, हो, हाय ॥

गूपाल ! बालुँ-बालुँ माँज छय फँरन ।  
हेरन स्व म्वखतुँ, जँरानो हो, हो-हाय ॥

वँछय तुँ कामदीनुँ, सीनुँ वायान द्राये ।  
जायेयि क्याजि, भगवानो हो, हो, हाय ॥

बिंद्राबन केशन, कृष्ण नुँ डेशन ।  
फेशन छि वतुँ, देवानो हो, हो, हाय ॥

रुँखमन गाँरथन, राधा माँरथन ।  
शीरथन क्वबज चे, मस्तानो हो, हो, हाय ॥

सुर असुर मारान, भवसर तारान ।  
सारन चुँ पाँनु शमशानो हो, हो, हाय ॥

पानय सुदामा, सुशीला छँरथन ।  
शीरथख चे, पार्यजानानो हो, हो, हाय ॥

शिकारा कोरुथ, पोरुथ ऊँ नमः शिवाये ।  
कनसुँ प्राण खँत्य को'हिस्तानो हो =हो, हो हाय ॥

लोचरिथ पाप-शाफ, पापियन ति गव माफ ।  
जाफ जॉलिमस, चुँ पुशँरानो = हो, हो, हाय ॥

गिरधर गोपालुँ ! गिरि हुंद वुछतुँ हाल ।  
साल छुय चे, सानि, यजमानो = हो, हो, हाय ॥

(36)

कृष्णो, वरुम रूँखमन बुँ प्रारान ।  
हारनाँवान छुख, छुख नुँ हारान ॥

क्या कर्यम धनुँ घर, क्या राजसी ।  
दिलफुट, दूखुँलद, करन बुँ आर्जी ॥  
मॉन्जि अथुँ लॉल, खूनि दिल बुँ हारान ।  
हारनाँवान छुख, छुख नुँ हारान ॥

शेशँपाल जे,शना, छुय मनावान ।  
रूँखमन बुँ, कृष्णँ जूला सजावान ॥  
कोहन तुँ बालन, यम मे खारान ।  
हारनाँवान छुख, छुख नुँ हारान ॥

सूज्यमय दूत, नादस गुपालो ।  
रातस बनाव्यम जय मालो ॥  
रथवान हयथ, कोना छुख चुँ लारान ।  
हारनाँवान छुख छुख नुँ हारान ॥

शीरिथ पूरिथ, द्रायि मंदरस ।  
बबस ज़न पोश फँल्य, मनि सँदरस ॥  
अँछव ओस त्रावान खूनि बारान ।  
हारनाँवान छुख, छुख, नुँ हारान ॥

गिरधर आँरी, करान सखरा ।  
गिरि दूतन वैन्य रूँच खबरा ॥  
वैरूँन रूँखमन कूँत्य रुप दारान ।  
हारनाँवान छुख, छुख नुँ हारान ॥

मंगान छस न लालो स्वोन मोख्तहार ।  
रवोट छस, छस न पौश्वत्, यारस ब यार  
छस ब लक्षमी, छुख च नाराण  
हारनावान छुख, छुख न हारान

वारिवि बान्ड् जेषणा छुय वजान  
मालिनि क्रष्ण जूला छुय दजान  
कनँ-वालेन स्वन मौरळँ तारान  
हारनावान छुख, छुख न हारान

(37)

कृष्णो लॉल वॅजनस बुँ माये ।  
रॅखमन भाग्यवान छुस हा, साये ॥

पानय तसलाह, दिवान पानस ।  
गंड करान, गॅहनस तुँ सामानस ॥  
दीशि त्यागुँच, ऑसुँस नुँ त्राये ।  
रॅखमन भाग्यवान छुस हा, साये ॥

शुराह सिंगार पूरिथ, गरि प्रारान ।  
श्रीधर यारस, मॅच बुँ छारान ॥  
साजस—सिंगारस, पे'यम हाये ।  
रॅखमन भाग्यवान, छुस हा, साये

वेरागि ओसुय, मनि मंज बाव ।  
गूपाल घरुँ कुन, प्रछँनय द्राव ॥  
माशोकँ याद छम, रासुँ ग्राये ।  
रॅखमन भाग्यवान, छुस हा साये ॥

सीरतस तुँ सूरतस, वुछिथ क्या कमी ।  
मायाजालुँ किन्य, मन छुम भ्रमी ॥  
नालुँमैत्य करान, कृष्णुँनि छाये ।  
कृष्णो लॉल वॅजनस बुँ, माये ॥

अथवास चौटनम मंज मारकस ।  
जंन ऑस खेला, जंन हा सॅरकस ॥  
चन्दकुय रावि यस तस छु जाये ।  
कृष्णो लॉल वॅजंनस बु, माये ॥

गिरि छिम सॅरी हयडान गेलान ।  
ग्वर पानस पानय तेलान ॥  
स्वर्गस मेलान दास दाये ।  
कृष्णो लॉल वॅजंनस बुँ माये ॥

फुँतुँ फुँतुँ कोरथम लावि भबरे  
बलराम सूजंनम लअलि खबरे  
वोनमस सूंचुन क्या मे पाये  
कृष्णो लअल वजंनस बुँ माये,

(38)

पय छम नुँ माजँय, कर बुँ जायस ।  
ब्रहमन यूनी, कर बुँ चायस ॥

चारुँ कर पानय, कासुम भ्रम ।  
दिगुँ छुम दिवान, माजस क्रूठ यम ॥  
नर्यव अरदहँव, रोजतम सायस ।  
पय छम नुँ माँजे, कर बुँ जायस ॥

मूर्ख, बँठिस, छारान, बुँ नावि तार ।  
दिलस पर्युन गो'मुत, हॉन्जस नुँ आर ॥  
नखस तुलिथ फुटँजा, पे'यस पायस ।  
पय छम नुँ माँजे कर बुँ जायस ॥

बब, माँज, बे'नि, बाँय, दूरेयम ।  
ह्यमथा, ह्यकथा मे',सोरेयम ॥  
सीरी, म्वचर बासोम मायस ।  
पय छम नुँ माँजे कर बुँ, जायस ॥

ज्जनमा मील्लिथ खो'ट छुम कर्म ।  
क्वक्रयायि—कॅर्य—कॅर्य, मो'ठमुत धर्म ॥  
कर्महीन, अथुँ खॉली, बुँ, द्रायस ।  
पय छम नुँ माँजे कर बुँ, जायस ॥

पॉपियन बुजान, तय तलान क्रायन ।  
ज्ञॉनियन वुछान, छायन तुँ ग्रायन ॥  
आलँछ्य तुँ मूर्ख बे'हन छि प्रायस ।  
पय छुम नुँ माँजे कर बुँ, जायस ॥

ब्रहमुन छू शूबान, शाहकॉरी ।  
शूब्यस ख्यो'न, फल तुँ तरकॉरी ॥  
गिरि ग्वर शूबिदार, कुस लायस ।  
पय छुम नुँ माँजे कर बुँ जायस ॥

सुल छय जीव छारुन ओमकार  
सूहम शब्द सोर, जेव छि तलवार  
सनि यस दय नाव, जागि रायस  
पय छम नुँ माजे कर बु जायस

नालमत्य नार मोहल्येन छुम करुन  
कातिल त गाफिल सोरतो मरुन  
कर्म किन्ध माँज जायस त प्यार्यस  
पय छे न माजय कर ब जायस ।



लॉलि छय मॉन्जिराथ, वुजुँनावुन ।  
मासुँ, प्वफुँ वनँवान, डुलँनावुन ॥

दमुँ-दमुँ , लॉलि मस, छि मुचँरावान ।  
टाछन व्यसन, वस छि पुशँरावान ॥  
रुमँ-रुमँ क्वंग चंदुन, मलँनावुन ।  
लॉलि छय मॉन्जिराथ, वुजुँनावुन ॥

लक्षमी आँडरान, स्वरगुँच मॉन्ज ।  
जल अनान गंगायि, नाराण हॉन्ज ॥  
सरस्वती वनान, ओम परँनावुन ।  
लॉलि छय मॉन्जिराथ वुजुँनावुन ॥

दरदिल वावुँमालँ, छिय बनावान ।  
प्वफ घेद वँर, मवंगुँ वँर्य पकावान ॥  
जखुन, जूरुन, लोला छु बावुन ।  
लॉलि छय मॉन्जिराथ, वुजुँनावुन ॥

मिठायन तुँ मेवन खँत्य अंबार ।  
गणेष जी पानय, कारस छुतार ॥  
कृष्ण वनन, खुलुँ दिल वरँतावुन ।  
लॉलि छय मॉन्जिराथ, वुजुँनावुन ॥

यज्मन बायि, ग्रायि छय मारान ।  
दुर्गा मॉज कांगूर, छि छारान ॥  
इसँबँद ज़ालुन, भूत सावुन ।  
लॉलि छय मॉन्जिराथ, वुजुँनावुन ॥

चर्यव-हार्यव ह्यो'त, क्रूर खारुन ।  
तुलसी मूर रठ, दार पारुन ॥  
मायि-प्रे'यमुँ, लोलुँ क्रूला, सजावुन ।  
लॉलि छय मॉन्जिराथ, वुजुँनावुन ॥

माता, दिवतुँ तबचि, पॉरन पूजन ।  
हंद व्वपलहाख, छारन, शो'द बूजन ॥  
अंग दिवान दोत्यन, नोव छु हावुन ।  
लॉलि छय मॉन्जिराथ वुजुँनावुन ॥

माजि रॉगिन्यायि पॉराव मँहरे'न्य ।  
इयकुँ बँड कूर नीर्यनय, म्यॉन्य बे'न्य ॥  
ब्रह्मा तति बब, छुय, चे जानुन ।  
लॉलि छय मॉन्जिराथ, वुजुँनावुन ॥

दूरुँ फोल माहरजुँ, थजि, डेडि चाव ।  
प्वखतुँ मोहरि, थदि खोतुँ थोद छुम, भाव ॥  
लॉलि त्रॉब, जयँमाल शोलुँनावुन ।  
लॉलि छम मॉन्जिराथ, वुजुँनावुन ॥

दारुँ पूजा कर, माजि अंभाये ।  
आशिर्वाद द्युत, शिवन-शिवाये ॥  
जे'शना तुँ जूला, छुम मनावुन ।  
लॉलि छय मॉन्जिराथ, वुजुँनावुन ॥

अँगनुँ दिवता छुय, जोरि प्रारान ।  
जोरि हुंद जीवन, रथि खारान ॥  
दयि नाव छुनुँ, कूर्य मॅशरॉवुन ।  
लॉलि छम मॉन्जिराथ, वुजुँनावुन ॥

मॉज दुर्गा करान, पोशि पूजा ।  
याद पाव, दोध तुँ अतॅगथ म्य सूजा ॥  
वॉरिव गछुन, छुनुँ सॅनिरावुन ।  
लॉलि छय मॉन्जिराथ, वुजुँनावुन ॥

दिमुँ क्या, गिरुँ बुँ कूर्य, आँही दिमय ।  
विजि-विजि, सहायतस, मदॅतस यिमय ॥  
लव तुँ क्वश, हूरि छुय ललुँनावुन ।  
लॉलि छय, मॉन्जिराथ, वुजुँनावुन ॥

(40)

ऊँ छुय सारिकुय सार  
ललुँनावुन छु ओम'कार ।

ओम ब्रमा वेष्ण महेश ।  
स्वरान रामजी, क्रष्ण गषेश ।  
मलेश सादस सपुद यार ।  
ललुँनावुन छु 'ओ'मकार ॥

ओम छु, तार परिलूकस ।  
इसतादँ, प्रथ प्रूगस ॥  
रुगस करान, संहार ।  
ललुँनावुन छू ओ'मकार ॥

शिव लिंगं छु साकार 'ओ'म ।  
सादँ बूजन छु, शोद तुँ सोम ॥  
कोम छु कामँदीनि आहार ।  
ललुँनावुन छु, ओमकार ॥

ओम अलख न्यथुँ नोनय ।  
वसतुरँ नुँ, ब्योनँ-ब्योनय ॥  
सोनय जाँव्युल, छू व्यवहार ।  
ललुँनावुन छु ओमकार ॥

ओम छु श्रूच, मनुं मंदर ।  
छँलिथ छुकिथ, शीतल स्वंदर ॥  
अंदर अँचिथ छु, गवरुँ दरबार ।  
ललुँनावुन छु, ओ'मकार ॥

ओ'मुक तीज, थदि-थोदुय ।  
प्रजलान सिंघि, छुय स्यो'दुय ॥  
हो'दुय-हो'खुय, ख्यवान दिलेदार ।  
ललुँनावुन छु, ओ'मकार ॥

ओ'म गंगायि, गंगेँ जल ।  
मूदिस जीवन, सफल ॥  
मल मनुक छु, जीव-शहमार ।  
ललुँनावुन छु, ओ'मकार ॥

ओ'म छार, नेर सौरस ।  
अथुरोट, कर चुँ गौरस ॥  
पौरस पघेन, चंदन-हार ।  
ललुँनावुन छु, ओ'मकार ॥

धुव तोर, ओ'म शबदन ।  
कंस मोर, क्रूँठ्य रबदन ॥  
अबदन, करान शूमार ।  
ललुँनावुन छु, ओ'मकार ॥

कॉली सजान, कलुँ माल ।  
औम बोजान, माजि हाल ॥  
ज़ाल च़ठ छुख गिरिफतार ।  
ललुँनावुन छु, ओ'मकार ॥

ओ'म मॉज-बे'नि, शर्य तुँ बाँच ।  
रावँराव्यम दोह तुँ राँच ॥  
जाँचन दिवान, व्यसतार ।  
ललुँनावुन छु ओ'मकार ॥

कॉन्सि बब, कॉन्सि छुय पती ॥  
पालान, लँच्य तय गँती ॥  
सरस्वती हुंद, छु सेतार ।  
लँलुनावुन छु, ओ'मकार ॥

ओ'म छु स्वन, गिर बुँ सरतल ।  
हूना छस, बरस तल ॥  
कल गनेमुँच़ दिम में तार ।  
ललँनावुन छु, ओमकार ॥

(41)

सखरा कर चुँ, साँरुँच वे'सिये ।  
त्याग वरदी चुँ, वाँरुँच वे'सिये ॥

साथा वुछिथ, सुवँनाव वर्दन ।  
जिंदिय कफन लागुन, गछुन अर्पन ॥  
दर्पन छु दय दीदार वे'सिये ।  
सखरा कर चुँ, साँरुच वे'सिये ॥

जीवुँ ! शमशानस, नजरा त्राव ।  
कलंदर, मालदार, कंजणय आव ॥  
साव अरमान, साव खम चुँ वे'सिये ।  
सखरा कर चुँ, साँरुच वे'सिये ॥

लटि अकि, पर अफूमेलिय तार ।  
पानय चे'ज्यनुथ, पानय चुँ हार ॥  
खार बो'ठ फँटमुँच, चुँ नाववेसिये ।  
सखरा कर चुँ, साँरुँ वे'सिये ॥

जेन आँही जीवुँ, फौलनय पोश ।  
ज्युठ घरयुक वरदान, थावुन चे'होश ॥  
जोश जाल, गाल हम तुँ भ्रम, वे'सिये ।  
सखरा कर चुँ साँरुँच, वे'सिये ॥

नेरुन छुय न्यथुनो'न, तुँ ननुँवोर ।  
गाशदार लाग मो ओन जो'र तुँ चोर ॥  
दोर धर्मुक छु, दूरलब वे'सिये ।  
सखरा कर, चुँ साँरुच वे'सिये ॥

ममता मँशरिथ, प्रे'यम सँनिराव ।  
साधँ सीवा, दयिभाव, गँनिराव ॥  
तँनिराव टाँठय, रिशतेदार वे'सिये ।  
सखरा कर चुँ साँरुच, वे'सिये ॥

ग्वरुँदीव ! चाव अमर्यथ, रागुक ।  
अथस थफ करुम, हाव राह मे'त्यागुक ॥  
वारागुक नार, वस मे'वेसिये ।  
सखरा कर चुँ साँरुच, वेसिये ॥

ग्वर दारन करुन, खसुन छुनुँ क्वह ।  
कर शुरु छार मो, माग तय प्वह ॥  
दोह बँरिथ, संध्या रुत साथ वेसिये ।  
सखरा कर चुँ, साँरुच वेसिये ॥

आख कति,को'त गछुन, छुय चे'सनुन ।  
मेचि हुंद बन्योमुत, म्यँच चे बनुन ॥  
वनुन, बाँज्यगार, संसार वेसिये ।  
सखरा कर चुँ साँरुच, वेसिये ॥



जीवँ । पूर्वन तति, छुय चे',मेलुन ।  
क्या करी, सरपुँ खेलुन तुँ, गेलुन ॥  
जेलुन तति, ये'त्युक बार, वे'सिये ।  
सखरा कर चुँ साँरुँच वे'सिये ॥

यावुन तुँ धनँ, जीवुँ छुनुँ पोशान ।  
ग्वरदीव बँखतिस वुछिथ छु, तोशान ॥  
रोशान नुँ, माँज—बब तुँ, यार वे'सिये ।  
सखरा कर चुँ साँरुँच वे'सिये ॥

ल्वकचार, यावुन छु वँहराँच, रुद ।  
तति मँगान दक्षिना, छिय मँगान सूद ॥  
मूद, कति छारि धन—धार वे'सिये ।  
सखरा कर चुँ साँरुँच,वे'सिये ॥

श्वंग मुँ जीवुँ श्रम कर छय बखती ।  
चालुन्यि सफँर, काफर तुँ सखती ॥  
गिरि करान ग्वुर इन्तिजार वे'सिये ।  
सखरा कर चुँ साँरुँच व'सिये ॥

(42)

पोशि थॅर छु, म्योन यावुन ।  
कॅन्ड्य हरि,प्यठ छु सावुन ॥

अँडिय कदम मूडॅ त्रावान ।  
हम तुँ खम, नुँ मॅशरावान ॥  
प्रे'यमॅ लोला, छु बावुन ।  
पोशि थॅर छु, म्योन यावुन ॥

बडि बोलुन, च़े'भाषा ।  
ज्युठ कडान, कथि वाषा ॥  
लो'बमुत गछि नुँ, रावुन ।  
पोशि थॅर छु म्योन, यावुन ॥

ग्वरॅ पूजा छि, फलदार ।  
बॅखतिस गलान, वे'ह तुँ नार ॥  
वसतुँर नो'व छु, छावुन ।  
पोशि थॅर छु म्योन, यावुन ॥

शुर तुँ बाँचा, मिचुँर्य को'ड ।  
खौश नो, मारतख च़ुँ होन्ड ॥  
मुह माया,छु तावुन ।  
पोशिथॅर छु म्योन यावुन ॥

लुकुँ निंद्या, मो कर।  
पान्य पानस म फर॥  
राम नाव, दोहरावुन।  
पेशि-थर छु म्योन यावुन॥

हेथ्य क्या आख, क्या चें'न्युनय ?  
नावितार छुय चें'तति धुनय॥  
हाव-बाव, मॅशरौवुन।  
पेशि थॅर छु म्योन, यावुन॥

बुजर पकान, दमुँ दमय।  
कठिन क्रूठा सुय, समय॥  
गिरि सु, दम छु, सॅनिरावुन।  
पोशि थॅर छु म्योन यावुन॥

(43)

मँज क्या ऑसस क्या बनेयस ।  
दय-दय नावस मँच सनेयस ।

स्यो'दुय ग्वरुँ दीवस, गँयस अर्पन ।  
ग्वरन, होवनम यूगुँ, ज्ञानुँ दर्पन ॥  
सर्पन तुँ गुनसन, मँज फसेयस ।  
दय-दय नावस मँच सनेयस ॥

रिशतव, वादव, कँरमुँच बुँ गीर ।  
तनहा बुँ दूखुँलद, बोवुम नुँ सीर ॥  
पीर कँरिहम, लॉल त्रहरेयस ॥  
दय-दय नावस मँच, सनेयस ॥

तीर वालिंजि आम, को'रनम चाख ।  
बासन वसान श्राख, ज़खमन छु पाख ॥  
वाख ललि हुँन्ध, पँरिम तय बलेयस ।  
दय-दय नावस मँच, सनेयस ॥

व्यवहार कँर्य-कँर्य खॉरहम हान ।  
बास्योम शमशान, घरि खोतुँ जान ॥  
जिंदुँ, पानँ पानय, जन दजेयस ।  
दय-दय नावस मँच, सनेयस ॥

अन्तः करन, शौद कॅरिम, ग्वरुँनुय ।  
वोँनॅनम राम-राम गछि, परॅनुय ॥  
बन चुँ सीता, गिर जॅन, ल्वतेयस ।  
दय-दय नावस मॅच, सनेयस ॥

मॉज क्या ऑसस क्या बनेयस  
दय दय नावस मच सनेयस

ममता, मोंह, माया जीवुं फंद ।  
 प्रेयमुं अमृत छलान, जंदची गंद ॥

प्रेयमें सागर,छु निर्मल निश्कल ।  
 फेरि-फेरि स्वंब्राव, छुय यूगें बल ॥  
 डल मुं वादन, जीवुं लेखुंन्य चे'छंद ।  
 प्रे'यमुं अमृत छलान, जंदची गंद ॥

मन ध्यानं, चूर द्युन, पकुन बेरे ।  
 प्रे'यमुं फल लागुन, दयस शेरे ॥  
 हेरे खारान, करान छुनुं खंद ।  
 प्रे'यमुं अमृत छलान, जंदची गंद ।

सांयकालुक, प्रेयमुं छु पोशंवुन ।  
 प्रे'यमुं दानस, लोलुं ज्युन, छु तोशिवुन ॥  
 कुन तुं कीवल, ख्यावनावन मै कंद ।  
 प्रे'यमुं अमृत छलान, जंदची गंद ॥

प्रे'यमुं खखुंजा खारन, मे'पावि-पावे ।  
 दयसंज दयगथ फ्रस बनान मावे ॥  
 टोठ सतग्वर बुछुम, अँछ करिथ बंद ।  
 प्रे'यमुं अमृत छलान, जंदची गंद ।

हिकटा करान, ग्वॅरु, सुदं छुम संग।  
डोल तय बाजि, गिरि हुंद अंग-अंग॥  
सतसंग दिवान मनुं मशके रंद।  
प्रे'यमुं अमृत छलान जंदेची गंद॥

(45)

हा जीवुँ ! क्याजि छुख, जाथ मैदछौवान ।  
हावान कोना छुख, रुत तय क्रुत ॥  
लौबमुत जन्म क्याजि, छुख रावैरावान ।  
हावान कोना छुख, रुत तय क्रुत ॥

क्रूधन खौरी, क्वहन तुँ बालन ।  
शालन सूँत्य करुँनावान ज़ान ॥  
सुँह छुय बनुन तय, सनुन वीरानन ।  
जानानन सूँत्य, थावुँन्य ज़ान ॥  
मान थाव जीवस, सीर छुनुँ बावुन ।  
हावुन छुय चे, रुत तय क्रुत ॥

कूधी बनख तय, बनख अहँकौरी ।  
सौरी बासनय, हून्य तय ब्रौरी ॥  
सौर्य-सौर्य पकँनुक, बनख चुँय औदि ।  
लौदी खसनय, पाफ तय शाफ ॥  
पाफ-प्वन्य, कॅर्य-कॅर्य, जन्म याद थावुन ।  
हावुन छुय चे, रुत, तय क्रुत ॥



क्रूधी रहें रौस, प्रथ विजि दजान ।  
वजान छुस ना, अन्द्रिम सोज ॥  
रोजि कति राथा, हर विजि खमान ।  
लमान हो छुम, गासुँ रजे ॥  
वजि कति सोज, तय जीवस छु यावुन ।  
हावुन छुय चे, रुत तय क्रुत ॥

क्रूध छुख करान तय मन छुख जालान ।  
वालान कोना छुख, फिहि सूत्य, शीन ॥  
जीन कर गुरिस, तय, लगाम रट्नावुन ।  
क्रष्य बनिथ चे रथ छुय चलावुन ॥  
हेंछुन छुय, सतु जोव, मुँरिस तल सावुन ।  
हावुन छुम चे, रुत तम क्रुत ॥

गिरजा छारान, गिरधर गारान ।  
मारान दयि—दयि बापथ पान ॥  
पान प्रजुँनावुन मोंह छुय त्रावुन ।  
त्रावुन छुय चे काम तय क्रूध ॥  
ग्वर प्रजुँनावुन छु मूद वुजुँनावुन ।  
हावुन छुय चे रुत तय क्रुत ॥

हा जीवुँ क्याजि छुख जात मंढुँछावान ।  
हावान कोना छुख रुत तय क्रोत ॥



ज्ञानी ग्वर म्योन, मसताना ।  
 लोलुँ होत, भक्त छुस, दीवाना ॥

मनुँकी पोश पूजायि लागस ।  
 रसुँ-रसुँ छुय यिवान, चूरि जागस ॥  
 मागस व्रत, दरान जानाना ।  
 ज्ञानी ग्वर म्योन, मसताना ॥

बागवान सजावान, पोशि डूरयेन ।  
 काँतिल पुचँरान, पोशि टूरयेन ॥  
 दूरयन गँचन, गछान गौर-जाना ।  
 ज्ञानी ग्वर म्योन, मसताना ॥

बखँतिस करि क्या ही तय पोश ।  
 अशि सुँत्य ग्वड दिवान डलुँ पंपोश ॥  
 दूष यारस, दिवान, अनजाना ।  
 ज्ञानी ग्वर म्योन, मसताना ॥

अर्ग चंदुना, लागुन शेरे ।  
 दीवँदार काबुँ, च़ेय कुन फेरे ॥  
 ज़ेरे दर्शुन, छु अफसाना ।  
 ज्ञानी ग्वर म्योन, मसताना ॥

कुल्य-कँट्य, अर्पन साँरी दीवस ।  
यिथुँ-तिथुँ सरखम शक्ति शीवस ॥  
लीवस छु, जाँहिल इन्नसाना ।  
झाँनी ग्वर म्योन, मसताना ॥

हेर-फेर छुय गछान, वलनय यिख ।  
ग्वरुँ दक्षिना गौरस, यिनुँ दिख ॥  
चिख दिवान जा शुर साहिबाना ।  
झाँनी ग्वर म्योन मसताना ।

नागन तुँ नालन, साजा वजान ।  
ग्वरुँ बखतन मनुँ, दून्या दजान ॥  
सजान कीवल, कुनुय भगवाना ।  
झाँनी ग्वर म्योन, मसताना ॥

टाँठ काँचाह छम, ल्वकटुँय पौर ।  
सरस्वती मुचरान, जानुँच दौर ॥  
लक्ष्मी कासान, सुनसाना ।  
झाणी ग्वर म्योन, मसताना ॥

निध्या नेन्द्रा फरान, मनुँ खजानस ।  
जागरन स्तुति, वथ व्यमानस ॥  
मधुर-म्यूठ, बासान याराना ।  
झाँनी ग्वर म्योन, मसताना ॥

नालुँ मति ग्वर रटान, भक्ति-भावय ।  
आत्मा शो'द करान कस बुँ हावय ॥  
मार्यमो'न्द छु आशक, आशिकाना ।  
झॉनी ग्वर म्योन मसताना ॥

जिगर गव जखमी, ऑशिस लॅज दार ।  
कारा कॅरिथ्र गव, रामुँ परिवार ॥  
गिरि रोजि, सनमोरव, दुरदाना ।  
झॉनी ग्वर म्योन मसताना ॥

मोहनदासा, माजि हन्ज छि छाय  
छुस बरान लोला, छस बरान माय  
ज्यूँठ क्रूठ समसार, कारखाना  
झॉनी ग्वर म्योन, मसताना

कनुँ दूर अँलरान, तंबलॉवान ।  
दूरुँ ग्रायि ग्रायि, मन मेँ, ब्रँमरॉवान ॥

ममता वुछान, त्रावान बडि असुना ।  
मॉज, दोह तारुँ छुय, लसुना बसुना ॥  
चेनुँवन, छुस दिवान, माजि वदनावान ।  
कनुँ दूर अँलरान, तंबलावान ॥

लगहस लीलायि, लगहस रासस ।  
गूपी छि प्रारान, लोलुँ, अथुँवासस ॥  
गुल तुँ गुलजार, रंगुँ-रंगुँ, फोलँरावान ।  
कनुँ दूर अँलरान, तंबलावान ॥

लगहस लीलायि, लगहस रासस ।  
गूपी छि प्रारान, लोलुँ, अथुँवासस ॥  
गुल तुँ गुलजार, रंगुँ-रंगुँ, फोलँरावान ।  
कनुँ दूर अँलरान, तंबलावान ॥

आशक ज़न लमान, दोति लोंचे ।  
बालुक छु, आशकी क्या बुँ सोँचे ॥  
न्यँन्दरे अंदर छुम, वुजनावान ।  
कनुँ दूर, अँलरान, तंबलावान ॥

जफ छुनान, बालुक, माजि पावान ।  
लायि कस, त्रिभवन, छुस हावान ॥  
इकवट्टुं दोनवय, न्यँन्दरा, त्रावान ।  
कनुँ दूर अँलरान, तंबलावान ॥

गूपियन वुछिथ गिंदान छेपिछारे ।  
नटखट बालुक, मोसुम छि, हारे ॥  
शुरि रुपस, मंज कति प्रजँनावान ।  
कनुँ दूर अँलरान, तंबलावान ॥

लॉरिथ गछान शुर, छुम, मॉजे ।  
छुम दपान त्याग, बुंगरितवाजे ॥  
ज्ञानुँ माला, तुँ दूरा मे'गरँनावान ।  
कनुँ दूर अँलरान, तंबलावान ॥

गिरधर सुँय, खारान चूरँ हान ।  
मनुँ कामना स्यद, छस लिवान दान ॥  
गिर छि, र्वनि मंजुला, हिलँनावान ।  
कनुँ दूर अँलरान, तंबलावान ॥

(48)

अछिपोश व्यँनु पोश, लागन नुँ बो ।  
शुर्य बाशि बोज, सोज ज़ानन नुँ बो ॥

पनने तनि, ड्युंठुम मे'अस्त असतय ।  
वो'ननम शरीरा, रथ, गंद तुँ बसतय ॥  
खसतुँ पावि-पावि, खसनस लगय बो ।  
शुर्य बाशि बोज, सोज ज़ानन नुँ बो ॥

दूरि-दूरि, चूरि-चूरि, छुम वुछान, आलम ॥  
नजदीक हनि-हनि, मनि छुम बालम ॥  
दूर्यर जुदौयी, ज़ानुँ कति, बो ।  
शुर्य बाशि बोज, सोज ज़ानन नुँ बो ॥

अनुँ कति मादल, कति शखती ।  
मनुँ डूर आवरुम, वँवुम बखती ॥  
शक्ति-शिवस, शरणगत बो ।  
शुर्य बाशि बोज, सोज ज़ानन नँ बो ॥

व्यनुँपोश आलुँनावन, तसुँन्जि वेरे ।  
वुशकुँ, अँगुन दीवस, लागन बुँ, शेरे ॥  
हेरे म्वखतुँ चूनि, छस जरान बो ।  
शुर्य बाशि बोज, सोज ज़ानन नुँ बो ॥



अहंकार, ज़ानुन, राख्युस असुर ।  
खुर अनान, ज़न कपसे, ज़ाशुर ॥  
मुर बरान विज़ि-विज़ि छस छलान बो ।  
शुर्य बाशि बोज़, सोज़ ज़ानन नुँ बो ॥

दूशुलद नारी, कर्मस मे'हान ।  
कर्महीन, धर्महीन, मानन बुँ आन ॥  
दान पुन्य करुँहा, अनुँ कति बो ।  
शुर्य बशि बोज़, सोज़ ज़ानन नुँ बो ॥

प्र'यमुँ अँगनस हुमान, छस अशिवोन्य ।  
बाज़रस खलबल, नोन न कांह वोन्य  
मारि कुस कस, जिंदय छस मरान बो ।  
शुर्य बाशि बोज़, सोज़ ज़ानन नुँ बो ॥

काँत्याह ग्वन गँन्ज़रय, गवनँवानो ।  
वै'षणुँ रुपुँ बालकृष्णुँ, मेहमानो ॥  
न्यन्दरे हचव अँछव, वँन्य दिवान बो ।  
शुर्य बाशि बोज़, सोज़ ज़ानन नुँ बो ॥

सन्तन साक्षात, दय छुय बासान ।  
बँखत्यन, रंगुँ-रंगुँ रूग छुय, कासान ॥  
दासन तुँ दाँसियन दासा बो ।  
शुर्य बाशि बोज़, सोज़ ज़ानन नुँ बो ॥

मनुँ बागस फोल्खें मे पांशि अंबार ।  
पोशि पूजा करॅम, मे'बारों बार ।।  
पोशि-पोशि पुशरन, चें'पोशा बो ।  
शुर्य बाशि बोज़, सोज ज़ानन नुँ बो ।।

रे'ह रो'स गिरधरुँ, गिरि दज़ान पान ।  
लंबख दूँह छकान, कोलॅच छेय कान ।।  
तानसेन छ्यँवरान, शेहलान बो ।  
शुर्य बाशि बोज़ सोज ज़ानन नुँ बो ।।

(49)

म्वरलीधर, बँ छारान ।  
अशि कनि, खून हारान ॥

राधा छस, बुँ बदनाम ।  
गिंध-गिंध, गछान, छुम शाम ॥  
छलुँ गरि ! छस बुँ प्रारान ।  
अशि कनि खून, हारान ।

मँच वॉचुँस, बुँ गूर्यवान ।  
आवुम नुँ केँह, अंजाम ॥  
अँन्य छस, छंबन सारान ।  
अशि कनि खून, हारान ॥

प्रॉर्य-प्रॉर्य, गछान दोह राथ ।  
छ्यनुँ गोम, कृष्णुन साथ ॥  
गमँ किन्य, पान मारान ।  
अशि कनि खून, हारान ॥

वरतम करय, सालाह ।  
लागहय जय, मालाह ॥  
ही तुँ व्यनुँ छस बुँ, चारान ।  
अशि कनि खून, हारान ॥

वाढुं कोरथम, तुं मॉरथस ।  
मंज वति, क्याजि त्रॉवथस ॥  
न्यंन्धायि, कन बुं दारान ।  
अशि कनि खून, हारान ॥

नाव दिथ, थोवथम मान ।  
राधा-कृष्ण छु, वरदान ॥  
पॉपियन ति छुख चुं, तारान ।  
अशि कनि खून, हारान ॥

नंदुं गूरिस, द्युतुथ ब्रम ।  
जौसँदाई, पोवुथ गम ॥  
काँत्याह चुं रूप, दारान ।  
अशि कनि खून, हारान ॥

अर्जुन छु, बोजान ज्ञाण ।  
गिर थवान ज्ञानस ध्यान ॥  
सत-ग्वर छुय में छारान ।  
अशि कनि खून हारान ॥

(50)

यिखँना च योर, सतिये ।  
चरनन करय, मँतिये ॥

तहखानस चुँ, रोजान ।  
सत-संग कोनॉ, बोजान ॥  
आश्रम छि, वति वतिये ।  
चरनन करय, मँतिये ॥

ह्यनरुँ मंज कोनुँ, नेरान ।  
घँरु-घँरु क्याजि, फेरान ॥  
आछुर छु, कँत्य कँतिये ।  
चरनन करय, मँतिये ॥

छार सन्यास, प्रकथ ।  
ले'जि चानि बनि बरकथ ॥  
बाँगराव, फल चे',तँतिये ।  
चरनन करय, मँतिये ॥

दो'ब्य कनि, मंग तय बल ।  
बलुँ सूँत्य छलतय, मल ॥  
प्रजलख ज़न, बँतिये ।  
चरनन करय, मँतिये ॥

यिवान छिय, दूरि दूरे ।  
दयि नाव, क्याजि सोरे ॥  
खातुँ खूल, सरस्वतिये ।  
चरनन करय, मँतिये ॥

शबरि पानुँ, बेर रव्यावुख ।  
गिरि ख्वनि, ललुँनोवुख ॥  
शबरि प्राँव, परमँ-गँतिये ।  
चरनन करय मँतिये ॥

(51)

ग्वर म्यनि मसतान यित सालो  
मय बरय प्यालस, दिम म्य प्यालो ।

मन यन्द्रस जामें, जाव्युल कतान  
प्रेम मोरव्वें कून्अ कून्अ, माता जरान  
स्वनें जामें, लागिथ दितम डालो  
ग्वर म्यानि मसतानें यित सालो

गच्छि कुठि पौरय, मखमलि खास  
वच्छि वालिन्जि मॉज, सनमोख बास  
पेशकश च्य तन मन रक्षपालो  
गवर म्यनि मसतानें यित सालो

आसन शूबीय च्य अन्ताकरन  
पजि प्रयेम सारी शुर, पेवन परन  
मनस शिल ज़ब पाज़, छुख दयालो  
गवरें म्यानि मसतान, यअत सालो

वेशनव श्रूच, भूजन पकावान  
थालन खास्येन छस सजावान  
ख्यावथ हन्द वोपलहाखें मालो  
ग्वर म्यानि मसतानें यित सालो

पर-तँ पान मशँरुम दिम सेदी ।  
परहा शास्त्र, छम न विदी  
विदिहीन, क्रयहीन वनन हालो  
ग्वर म्यानि मसतानँ, यितँ सालो

छयोट खेय-खेय, जीव छुख क्रिटयोमुत  
मामस खेय खेय वोदुर मोटोमुत  
तन श्रोचि, लागुम तन म्य लालो  
ग्वर ग्यानि मसतानँ, यित सालो

क्रंजंन मॉलिख, लूभी अभिमानीय  
यमँराज यमदूत, यार जानीय  
पापियन च बासान,यम त कालो  
ग्वर म्यानि मसतानँ, यित सालो

दान पुन्य करहा, छम न रवोटहार  
लक्ष्मी टोठि कति, छस गिन्दान जार  
ग्वर सह छुख, भक्त छसय शालो  
ग्वर म्यानि मँसतान, यित सालो

बुजँमँल गगँरायि गुजँराव्येम  
जूनि हुंद, शेहजार, शेहलाव्येम  
सत-व्यचअर फेरान कोह त बालो  
ग्वर म्यानि मसतान यित सालो



भोम्बरो पोश छार, फेर मो कंडयन  
होदुय होखुय मजँ कति मेलि मेन्डयन  
यमबुरजव्ल सजावान, पोशियालो  
ग्वर म्यानि मसतानँ यित सालो

दोनवय भक्त, करान, चरणन ने मीठ  
लालँ सालं युन छुय, कदम त्राव जीठ  
गिर ज़पान गिरधर गूपालो  
ग्वर म्यानि मसतान यित सालो

(52)

मुह छु अन्यगोट, माया अन्धकार  
लालस असँय नेरनस लार

जानकी रोछँनख, द्योद, दानय  
अतँलास वलान, लक्ष्मन छु पानय  
खानय सपुद दमँ दमँ शूबिदार  
लालस असँय, नेरनस लार

दय टअठिस अस, राजँ प्रकथ  
राम रूपस, अँस लेजि बर्कथ  
गथ कर्न, कोमुक टोंठ ताजदार  
लालस असय, नेरनस लार

सनातनधर्मी, सत्यवादी  
लेखान इतिहास, बुरँबादी  
आदि वुछुम, दिलबर, दिलदार  
लालस असय, नेयरनस लार

टोठेय लक्ष्मी मअज, सरस्वती  
रँस रँस पालिन, लेच तय गती  
तती नागबल बासन सु बालँ यार  
लालस असँय तेयरनस लार

निर्धन यतीमन, माज तय मोल  
बोछिहतनय बरान चन्दँ तय लोल  
होल गोमुत, नुवुन मनकुय करार  
लालस असँय, नेयरनस लार

नागडंडि ओसुय, वीदा परान  
कोम कल्याणा, यूगी स्वरान  
जिन्दय मरान वुछ, अछव, अत्याचार  
लालस असँय, नेयरनस लार

बेदवारि डायि बजि, सपँदोव शाम  
जगत गव, बेचेन बेआराम  
बाम छिय, मलान लूख, खँन, अशिदार  
लालस असँय, नेरनस लार

वोथवुन बहेवुन, वनान श्रीराम  
त्रोवमुत ओसुन, क्रूध तय काम  
पाम बासान, व्येनहार, पोशिहार  
लालस असँय, नेयरनस लार

प्रेमी प्रावथ, परमयगती  
लथ दिथ त्रोवुथ सोरुय यती  
तती छुय सोम्भरिथ, अँन अभबार  
लालस असँय, नेरनस लार

खेचिमावस छोरुन, रुत दोह  
येमि बापथ लूख फेरान कोह  
पोह, रेथ, रेतन, हुँद रेथ सरदार  
लालस असँय, नेरनस लार





लेखिका:  
गिरजा कौल

नाम पुस्तक	:	गुरु दक्षिणा
साल	:	2001
लेखिका	:	गिरजा कौल
पति का नाम	:	श्री. एम एल कौल
पिता का नाम	:	स्वर्गीय विश नाथ जद
माता का नाम	:	श्रीमति गुनवती जद
जन्म स्थान	:	अन्नत नाग काश्मीर
मूल्य	:	60/- रु

